

泉根紅安

奴才增祺廷杰跪 奏爲酌擬勘辦西流水圍荒章程十條恭摺開單具陳仰祈 聖鑒事竊奴才廷杰
恭奉 簡命會同奴才增祺勘辦西流水圍荒事務歷蒙 派員勘辦至今未能竣事辦理自應棘手奴
才廷杰詳核案卷俯察輿情與奴才增祺推究其病源之所在固由委員不得其人亦因辦法未能盡善
蓋立法所以防弊法太繁則防弊適以滋弊現擬刪繁就簡酌定章程十條俾愚民易於遵行黠吏無從
欺飾其章程之前七條係就原章量爲變通後三條則補原章之所未備一併繕具清單進呈 御覽恭
候 命下遵卽刊刻多張榜示通衢俾衆周知奴才廷杰卽日馳赴各圍履畝勘丈仍將引繩分界各事
宜認真督查務使弊絕風清惟查工部侍郎鍾靈前經勘道二十圍內其勒支得恩圍歸勒嚇哈達圍
未勘畢今奴才廷杰入圍接勘尙有二十五圍之多因期奮迅趨功亦難草率從事竊恐年內未能辦竣
理合先行聲明所有奴才等勘辦西流水圍荒酌擬章程緣由謹會同恭摺開單具陳伏乞 皇太后
皇上聖鑒訓示遵行謹 奏奉 硃批著照所請該部知道單併發欽此

謹將酌擬勘辦西流水圍荒章程十條開具清單恭呈 御覽

一各圍丈出浮多之地前已封除者擬仍令原墾戶繳價領回然亦未便漫無限制其浮多之數不過原
領地數者准其每畝繳價庫平銀一兩二錢照章請領新照永遠執業如此外再有浮多罰令按畝加倍
繳價方准承領若不願承領撤出另放至丈過各圍有地不足數者擬各就本圍山荒照數補撥發給新
照未丈各圍請均照此次新章辦理

一有照無地○戶請以廢鎮基及各圍間荒撥補如有不敷請以山塲生地按三七折放有不願折領山荒者由浮多地價項下撥還原交荒價執照註銷其山場熟地多係貧民私墾擬俟有照無地各戶放竣准其照章交價承領

一有地無照之戶如所報地段字號冊查無重複准其取具地鄰練長切結照章補給新照免交荒價其與冊開號數重複即係無照捏報失照雖有地鄰練長保結仍令按畝補交庫平銀一兩二錢照章請領新照如於臨清丈時始稱執照丢失者亦如之

一收價執照分界執照及添註多字執照均以蓋有關防鈴記者爲真分別予以熟田間荒鎮基山塲准其照章換照概免交價其無關防鈴記已得地者擬仍令照章交價換照未得地者即予該銷至繳照逾限每畝再交荒價六錢蓋從嚴以催其速繳也既據繳到但查其照無訛外交價一節應請寬免惟此項定章以後再有繳照者不在寬免之列

一樹川一項前經奏明以已收執據爲定地後一律截止不收查收已執據一百三十八紙合銀三十一萬兩茲查得扎克丹哈達圍有風鳥樹川長三十里寬十五里以里計畝約得地千方有零折除四成溝途窪墊可得地六百餘方擬請每地一畝照朱朱湖圍上等膏腴章程作價四兩計地一方合荒價銀九百六十兩僅需地三百餘方即敷撥放已收之執據餘地及別圍樹川容俟到圍查勘明確再行奏明辦理一已廢鎮基擬減爲每畝收荒價銀一兩二錢照費仍照章每畝收銀一錢未放山荒收銀三錢照費

減爲三分更名之地擬照田房稅契例每荒價一兩收更名費三分

一收支分局向設開原縣城內爲圍中各戶交價領照之所惟距圍較遠民多未便查西豐縣治地居全圍之中擬請移置該縣治所清丈分局向以平正通達四字分爲四局今擬裁併二局

一不堪耕種之山荒擬留作樵採牧養之地嚴禁貧民私懇私例以防日久沙石鬆被山水冲刷而下淤墊良田

一各圍大小不同均宜酌留義地或數十畝或百餘畝不等其田畝櫛比鱗次無車馬行走道路者宜於各戶地邊酌留一弓之地以便運載往來免啓爭端擬請由浮多未領地內擬充義地及公用道途

一西流水圍荒既設西安西豐兩縣當更加放學田預爲留儲况現正興建學堂學田尤多多益善擬請由朱朱湖圍原佃墾種歷經納租地內酌量分擬飭各該縣另與議租免交荒價其餘地畝仍照奏定章程上等膏腴每畝收荒價銀四兩中等三兩不及中等者二兩奉 硃批覽欽此

商部片 再臣部總理商務擬請設立鐵路礦務農務工藝各項公司業於籌議章程摺單內詳晰具奏查泰西各國商政首重設立公司中國風氣初開臣等創始經營良非易事加以商情渙散財力未充從前各省開設局廠或官督商辦或官商合辦每因章程未善不免有牽掣抑勒等弊以致羣情疑阻現臣部辦理一切首在破除積習以期上下相孚事權歸一惟臣等竊有鯁鯁過慮者則以管轄之權雖在臣部而所辦農工路礦諸務無一非地方大吏之責成如或內外隔閡未能合力振興勢將無所措手相應

請旨飭下各省將軍督撫於臣部所設各公司事宜務須會同籌畫贊助維持一面嚴飭各該管道府州縣盡力保護毋稍膜視至臣部派出考察商務各員亦必選擇誠實通達之人應與地方官彼此接洽俾得呼應靈通如係該省自行難辦尤須廣爲董勸力杜弊端並將辦理情形隨時知照臣部藉資查覈臣等受恩深重兢兢以不克稱職爲慮該將軍督撫等必能共矢公忠顧全大局倘或推諉因循及該管地方官遇事不能襄助以致商務久無起色臣等卽當據實奏明不敢稍涉遷就是否有當理合附片具陳伏乞聖鑒訓示謹奏奉旨 一道

山西巡撫臣張曾敷跪 奏爲晉北客軍撤減地方空虛請暫截留晉餉添募防軍以重邊疆而紓餉力恭摺 奏陳仰祈 聖鑒軍竊臣于光緒二十九年七月初二日奏請暫留忠毅軍兩營聲明晉北邊境遼闊防務吃重擬再添練數旗以固邊圉業經奏邀 聖鑒在案伏查晉省北路地方廣遠舊設制兵一萬數千人至咸豐同治以來猶須添駐客兵以資防緝前升任撫臣張之洞曾議添練大同歸化兩軍八千人誠見漠南關北外接烏科各城內連直陝各省非有大枝勁旅不足以資控制而嚴拱衛也近歲制兵全撤續備募練未齊而非邊口外散勇馬賊出沒無常其間教堂林立設有疏虞所關尤鉅加以邊廳初設墾務大興彈壓巡防均資兵力比年以來全恃大同鎮劉光才所部忠毅五營今劉光才已 簡任廣西提督所部五營前蒙 恩准以兩營留晉此外大同鎮惟有續備軍馬步七旗主客合計不過二千二百餘名而駐防地方自省北至口外十一廳寬廣數千里零星撥劄顧此失彼於是南路之續備太原

之常備不能不移緩就急紛紛抽調匪特軍疲道路訓練日疏抑且腹地空虛盜賊滋熾臣自受事以來深維晉省近接畿疆在今日尤爲重鎮函思添練勁兵爲未雨綢繆之計無如晉省司庫久已入不敷三而大案償欸本省賠欸及一切創行新政皆需費甚鉅而無一可爲緩圖旣不能移應用之欸以練新兵又不敢以籌欸之難而緩募練臣與司道等再四籌商殊無良策惟查忠毅軍五營歲需餉項係指撥山西應解內府封儲銀十萬兩鐵路經費銀五萬兩鄂省協撥銀二萬四千兩舊欠光緒二十七年東北邊防經費劃撥銀一萬七千七百兩現在該軍祇留兩營在晉勢須趕緊添兵而餉項實無法籌措惟有仰懇 天恩俯念晉逢之重司庫之艱准將內府封儲鐵路經費兩項共銀十五萬兩暫留晉省除原撥忠毅兩營餉項之外卽就此欸先募足大同續備軍步隊兩旗以符 奏案再添練馬隊四旗以資填劄其不敷之欸及軍火操衣節賞等項仍照案由舊欠東北 防經費內劃撥如此轉移涉山西近歲解部之欸仍無出入而本省得藉以稍增兵力近固邊無圉上拱京畿裨益大局實非淺鮮俟一二年後本省賠欸付清仍卽按年籌解以期於部欸無誤至劉光才所部忠毅三營餉項鄂省自應照撥此外不敷之欸查湖北湖南廣東每年應協廣西邊餉共三十六萬兩歷年欠解甚多以廣西受之餉養廣西軍防勦之兵尙非無著之欸可否請 旨飭部催解抑或動撥之處伏乞 聖裁所有請留餉項添募新應各緣由理合恭摺具 奏伏乞 皇太后 皇上聖鑒謹 奏奉 硃批戶部議奏欽此

太子少保北洋大臣直隸總督臣袁世凱新授商部右侍郎順天府府尹臣陳璧隨 奏爲正陽等門城

垣樓座工程勘明輕重情形請俟正陽門修竣再行分別估辦恭摺仰祈 聖鑒事竊臣等欽奉光緒二

十九年六月初七日 上諭工部奏正陽等門城垣樓座情形請飭修葺一摺此項工程着仍派袁世凱

陳璧切實勘估俟正陽門修竣後所餘之款即行分別輕重陸續修理欽此遵經飭派天津道王仁寶試

用道尹家楣按照工部原單逐段勘明核實估計去後茲據該道等勘得正陽等門城垣樓座各處情形

與工部原奏清單大致相符惟工段甚多情形不一其尤爲重大者如德勝門大樓閣樓頭停破壞大木

間有欹朽朝陽門迤北城牆陷深三四尺不等長至二十餘丈誠如工部原奏工程緊要勢難緩修至西

直門角樓上年業經工部估價未修本年又經步軍統領衙門咨請工部修理體制攸關自應修葺以壯

觀瞻其餘各項工程坍塌已甚但地非衝要暫可從緩茲將德勝門大樓閣樓朝陽門城牆西直門角樓

三項工程擬就做法切飭廠商核實估計據稱各項物料概歸商辦約需銀三十五萬兩係按現在情形

而言若年復一年工程加重尙恐不止此數查各省報効正陽門工款共銀五十二萬三千餘兩內除直

隸報効銀五萬兩撥濟京師醫學堂經費滇省報効銀一萬兩因軍務緩解外實計銀四十六萬三千四

百餘兩除應付正陽門大樓閣樓工程銀四十二萬九千九百餘兩又撥修馬道等工銀一萬三千餘兩

所餘工款僅銀二萬四百餘兩以之撥修德勝門樓等三項工程尙不敷銀二十二萬餘兩將來正陽門

樓修竣自當奏撥專款以濟工用至西直門角樓殘缺太甚 懋輿臨幸 頤和園時該處切近 蹕路

應將參差不齊之木石磚瓦先行拆平以示齊整等情稟請覆奏前來臣等謹查工部原奏單開各工多

至一百五十餘處昨准部咨續出工程又有二十餘處若擬同時興修實恐無此財力現就情形最重之德勝門樓朝陽門城牆西直門角樓三項工程約略估計已需銀二十五萬兩而正陽門樓正欵除撥用外所餘無多撥作德勝門樓等三項工欵尙不及十分之一惟有俟正陽門樓工竣再行覆勘估計請旨定奪其餘各工從緩佔辦至各工地段縣長照料非易現在既未興修應請旨飭下步軍統領衙門飭令弁兵隨時查看情形咨報工部以昭慎重謹合詞恭摺具奏伏乞皇太后皇上聖鑒訓示謹奏奉 硃批依議欽此

頭品頂戴兵部尙書銜山東巡撫臣周馥跪 奏爲災區需賑孔殷擬請截留節年徵存漕折等項銀兩以資散放恭摺仰祈 聖鑒事竊臣於七月初七日接奉電傳 上諭周馥奏山東自閏五月二十日以後連日大雨各河同時盛漲東平州費縣平陰東阿陽穀等縣猝被水災冲塌房屋並無淹斃人口又福山縣煙臺一帶於六月初三日大雨山水下注海潮陡漲冲塌民房三千餘間淹斃人口一百五十餘名災情甚重小民蕩析離居深堪憫惻著該撫迅卽查明災區分別賑撫毋任流離失所一面嚴飭堵合堤埝疏消積水以免久淹爲患毋稍遲緩欽此仰見 皇太后 皇上軫念民依無微不至臣前次拜摺後據各州縣續報水災者尙復不少情形輕重不均均經臣批節妥爲撫恤並飭將黃河上游民埝及運河一帶各處漫口設法堵築招集附近災民以工代賑民情尙屬安謐惟念各該州縣地處均係積年災祲之餘元氣未復今復慘遭昏墊小民蕩析離居情形尤爲困苦轉瞬隆冬飢寒交迫必須預籌接濟來春

青黃不接爲日甚長亦應再加撫恤統計冬春兩賑非有大宗的款不足以全活災黎山東庫款本已羅掘一空此次罹此奇災下忙丁糧應蠲應緩爲數必鉅入款頓減出款驟增而軍餉洋款及一切要需又難延緩應解京餉均已撥作直隸武衛右軍餉需實屬無法騰挪近雖勸辦賑捐而四川廣西等省亦皆援案開辦捐生祇有此數彼盈此絀勢所必然已收之款陸續撥用殆盡未來之款收數能否踴躍殊無把握欸絀用鉅焦急萬分伏念 朝廷惠愛窮黎各省遇有水旱偏災一經疆臣奏請無不立沛 恩施光緒十五十八二十一二十四等年山東壽張等縣被水疊經前撫 奏請將新漕正耗並隨漕輕齋等項全數截留每次計銀三四十萬兩不等均經欽奉 恩旨允准有案本年災情較重而庫欸奇絀不敢照前多請臣與司道悉心籌畫查督糧道庫尙有節年徵存未解漕折及行糧減平等欸約計銀二十萬兩左右擬請全數截留濟賑以廣 皇仁而全民命臣仍督飭勸捐各員廣勸募並廣求南省義紳集資協助臣明知部庫萬分支絀然民命攸關不得不披瀝上陳相應仰懇 天恩俯念災區待賑孔殷允臣所請則億兆災民得免流離失所不勝迫切待 命之至謹恭摺 奏請伏乞 皇太后 皇上聖鑒訓示謹 奏奉 硃批着照所請戶部知道欽此

頭吊頂戴兵部尙書銜山東巡撫臣周馥跪 奏爲遵 旨查明知縣被參各欸據實覆陳恭摺仰祈 聖鑒事竊臣承准軍機大臣字寄光緒二十九年閏五月二十三日奉 上諭有人奏山東濰縣知縣袁相與委員曾培出示催捐仰勒商民騷擾地方並曾培前署濰縣藉教堂賠欸攤派分肥請飭查辦等語

者周馥按照所指各節確切查明倫有勒捐擾民及藉案分肥情弊卽行從嚴參辦勿稍徇隱原摺著鈔給閱看將此諭令知之欽此遵 旨寄信前來等因承准常經札飭布政使胡廷幹籌款局道員朱鍾琪遴委候補直隸州知州王賡廷按照原參各節確切訪查茲據該委員逐款查明稟由該司道覆核會詳請奏前來臣覆加查核如原參濰縣在烟台青島周村之間所有大宗貨物車載一過本地留銷者甚少間有二三客棧祇寓來往行人並無山積大宗貨物街市僅有零估負販資本甚微且自青島至周村大車暢行之後貨物在濰縣卸棧者無百分之一二卽按售賣百貨釐金徵抽爲數亦甚寥寥並非若周村銷貨差多尙可勉強認派也自前年委員到濰縣辦捐派以一萬餘金該縣鋪戶全行閉門歇業嗣後官家巧立名目勒派濰商捐銀八千兩定爲歲額如極小之銅首飾鋪筆墨鋪點心鹽菜線貨等鋪零剪洋布鋪以及女工繡之家亦須分攤認繳出示催捐危詞恫喝一節查長山縣之周村爲山東著名大鎮商賈雲集濰縣次之該處向無釐局前撫臣欲整理工商諸務爲民興利苦無經費可籌擬略仿各省抽釐成案酌收貨捐以濟地方之用官民久議未定旋據周村商董以按貨收捐等於抽釐數目繁重不由各商號分別資不大小賣買衰旺酌定數目每年統捐銀一萬兩分年呈繳名曰商捐作爲地方應興利益及各項善舉之用自上年試辦起商情尙屬踴躍濰縣商務雖不及周村之旺然行商坐買大小十九行行銷貨物而較他處市面爲盛該處爲膠濟鐵路停頓馬頭地方繁庶應辦之事應與之利極多加設學堂築馬路興工藝等事必須逐漸試辦前因該縣學堂未立臣已發給銀三千兩又因鐵路已通該

縣應修車馬分路以便行李已飭商務局籌撥銀三萬餘兩此外要需議照周村商捐以資補助上年會據濰縣商人公議認捐銀八千兩嗣因年節臨邇議將冬季捐項緩至本年分季帶征以紓商力本年三月十四日欽奉 懿旨苛細雜捐卽行停止等因欽此當經檄飭司道欽遵辦理將瑣細捐項卽行停免該商等疑爲大宗捐項亦在應停之列隨相率觀望希圖邀免卽經籌款局司道派委候補知縣曾培會同濰縣知縣袁桐出示勸諭迄今欵尙未交該印委等亦遂未加僅索並無巧立名目危詞恫喝之事又原參濰縣知縣袁桐到任半年諸務廢弛詞訟拖延盜案疊出賭博不禁一節查袁桐自二月到任創立學堂振興工藝尙知講求吏治其審理詞訟均係隨到隨審或因人証未齊未經審結者僅二十餘起二三兩月境內出有被竊行強之案二起均經勒限嚴緝濰縣賭風素熾該員到任後卽出示嚴禁尙非諸務廢弛又原參袁桐年少性剛動用非刑紳民畏之如虎一節原奏並未指明何事何案無從查究訪查並無動用非刑情事惟該縣創立學堂袁桐擬暫租監生陳榮開院作爲學舍陳榮不允該員開導不服反行頂撞隨當堂斥責致紳士嘖有煩言原奏或卽指此又原參委員曾培前署濰縣知縣時值民教不和庸懦坐視釀成焚燬教堂巨案嗣辦理教堂賠款強派濰民湊銀五萬餘兩從中分肥上憲聞其劣跡卽行撤任一節查光緒二十六年五月間濰縣拳匪焚燬美國教堂一所旋經洋務局爲美國教士議定賠款銀四萬五千五百兩先由洋務局墊付銀二萬兩因曾培前曾署理濰縣知縣官聲尙好飭令前往濰縣會同印官勸捐在書院設局該縣紳士陳姓等公同收欵兩月之久收銀一萬餘兩交存縣庫曾培

旋即奉委代理樂安縣知縣此後收欸均由縣紳接辦曾培無從染指原參謂其藉教案賠欸攤派分肥自係傳聞之誤以上各節既據該司道委員查明或事出有因或並無其事應請無庸置議維袁桐向監生陳榮暫租學舍因其不允頂撞輒予斥責辦理未免躁急業已撤任調省任內所出盜案犯既無獲應卽照例開參並飭接任之員嚴緝贓賊務獲究辦伏查山東地處濱海膠濟鐵路轉瞬直達省城礦務繁興利多外溢亟應振興學校講求農商工藝以開風氣而便民生無如經費支絀籌辦不易卽如中小學堂各府州縣至今尙未辦齊臣擬每府州縣每年酌助數百金通省十府一百七州縣歲需銀四五萬兩他如蠶桑一事山東出產不少祇因植桑養蠶繅絲不得良法遂致難獲大利現擬設立蠶桑學堂以期求精改良又華德公司鐵路礦務本應華商入股因商股難集曾飭商務局代買鐵路股票十餘萬兩以備將來風氣漸開華人得以備資向官購取同得利益其礦務股票現尙無欸購買此外民間應興之利不勝枚舉皆以欸絀猝難舉辦又恐紛擾升任撫臣袁世凱奏設籌欸局整理稅捐大都取諸中飽者居多原欲以地方之欸興地方之利臣循其舊章補其遺漏量加整頓未嘗多取於民卽周村歲捐一萬兩仍爲本地農桑等事之用雖縣現認商捐如將來繳欸亦湊作該縣學堂等項經費此係本地善舉民捐民用與公項無涉由官隨時督同紳商體察情形酌量辦理倘衆商始終觀望無所用其催迫亦不必稍加抑勒總期於國計民生兩有裨益以仰副朝廷恤商愛民之至意所有查明知縣被參各欸緣由理合據實覆陳伏乞 皇太后 皇上 聖鑒訓示謹 奏奉 硃批知道了欽此

督辦墾務理藩院尙書銜兵部左侍郎奴才貽穀跪 奏爲察哈爾右翼墾務成效過半謹陳前後辦法及各員出力情形恭摺仰祈 聖鑒事竊奴才前奉 諭旨飭將察哈爾蒙地一律招墾業將籌擬右翼四旗辦法於光緒二十八年六月間會同都統奎順具奏並隨時將設局招墾分界及王公報効馬廠各情形疊次陳明在案伏查右翼蒙地分隸豐鎮寧遠兩廳蒙員地商私相授受歷有年所自光緒八年經前山西撫臣勘辦押荒升科十一年奏結二十五年復行續辦截至奴才接辦之日據豐甯押荒局呈稱兩次墾地共三千餘頃奴才到墾後詳加考察已墾而未報者固不止此數已報而未經官丈放者尙未及半是以任事之初卽將押荒舊局改爲豐甯墾務局所有收項欸目及剩存部照一併截清遴派委員於上年五月初一日開局接收奏明後卽按照現擬辦法將查勘荒熟招報私墾催收押荒各事宜分定章程及時開辦該處畝半已私開就局外觀之化私爲公似甚易於措手一經身親其境乃知清理舊墾有較之招闢新荒其難倍蓰者各旗蒙地向分蘇木蘇木中之大小蒙員率皆貧窘漢民之來口外者挾資以餌之詭謀以誘之蒙員謀利之工視漢民不逮而其行詐之術又惟漢民是師往往一地而先後私放數人或數人而先後同放一地甚且含混指界文約無憑愈後則僞據愈工愈辦則鞅鞅愈結往時押荒之不能暢收幾疑催徵不力使然不知纏訟未清則舍稽事而相忿爭荒價何由而出自奴才到墾以來豐甯兩廳之爭地呈訴者不下數百起奴才隨時批飭局員從速訊詰又因在局斷結之案勘丈時每有翻異復飭該局會辦幫辦帶同承審繩丈各員分段親往地所傳集兩造隨到隨訊隨結隨丈計爲

時數月該委員等寬嚴互用心力交施始得積年控訴互爭各案斷結十之七八地畝亦即挨次丈清其
生荒地畝仍按每號五頃每畝三百六十弓分丈編號綜計豐鎮寧遠兩處丈明地畝共二萬四千餘頃
除應留官兵隨缺地牧地由奴才會同都統查核劃撥另行具奏外共放過報墾未交押荒生熟各地一
萬四千餘頃未經放墾荒地一萬餘頃現已分別招民領種應留缺牧各地即在未放生荒地內劃撥其
已放各地按奏定新章每畝三錢核計應收荒價銀四十二萬兩又應代徵從前辦結地價荒銀九萬八
千餘兩惟查豐甯兩廳之間有地名灰騰梁跨連三旗縱橫百餘里泉多山峻六月猶寒非獨播種難施
卽樵牧亦多不至此外亦尙有地質礮薄不堪耕種者應仍留作公共牧地上年定章出示後本限九月
初一日起至十月底止催令呈報私墾聽候勘丈分別飭交押荒惟訟案既未全清私墾亦難全報又值
上年口外風旱歉收民情異常困苦不得不稍示體恤展限催交計自二十八年九月起截至本年六月
止共收過銀十五萬餘兩該民戶等押荒交清卽隨時填給部照收執今年雨澤尙屬應時但使秋後不
值風災歲收可卜中稔交納荒價自當較前踴躍約計今冬明春可一律放竣荒價亦可陸續徵收此右
翼墾務成效過半之實在情形也至墾放蒙地較之內地辦墾本自不同其事機之棘手更爲奴才思議
所不及料今者平疇在望榛莽胥除羣力經營微勞自不可沒奴才上年隨帶司員及初次奏調各員到
墾者計十數人復就晉省需次他處投效各員中揀選咨調委用現在該員等或在奴才左右盡心贊助
或在豐甯兩局分任要差均屬有勞足錄查近年奉天大凌河牧廠熱河圍場開放荒地疊經該將軍都

統等將出力人員照異常勞績奏保奉 旨允准有案此次右翼墾務闢地加廣措置尤難勞苦亦視他

處尤甚可否俟年終時由奴才將出力各員援案擇尤按異常勞績請獎出自逾格 恩施其西盟墾務

亦已開辦現就各旗呈報地畝計之廣輪已二三千將來應用員弁更電加倍惟得力之員不可多得

經費亦宜預爲撙節刻下豐甯墾事既漸次告竣員數即可漸次裁減擬將此項人員移往西盟墾局與

該處現派各員一併差遣此外除尙須酌調精通繙譯數員以後不再奏調以資熟手而節餉需所有察

哈爾右翼墾務成效過半陳明前後辦法既擬將員弁鼓勵移調情形理合恭摺具陳伏乞 皇太后

皇上聖鑒訓示遵行再左翼墾務現在暢行丈放之際亦須親往查勘且有應與都統奎順等商辦事宜

奴才擬八月初二日啓程赴張家口合併聲明謹 奏奉 硃批准其擇尤酌保毋許冒濫餘依議欽此

頭品頂戴兩江總督臣魏光燾江蘇巡撫臣恩壽跪 奏爲江蘇留防軍需第二十九案造冊報銷恭摺

具陳仰祈 聖鑒事竊照江蘇省裁改留防海防湘淮馬步水師七十三營旗並哨隊分布扼紮以備緩

急所有各該營旗應支糧餉正雜各款均照楚軍營制及歷屆准銷成案分別核實支給業將光緒二十

五年分用欸列爲江蘇留防第二十八案造冊報銷經前督臣劉坤一專摺會 奏所有光緒二十六年

分前項各營旗仍照案接支嗣因北路軍情緊急江海防務戒嚴並經前督臣先後 奏明將裁改之盛

字等三十旗每旗添足五百人改旗爲營督提鎮標新兵練軍十三營各照從前舊額暫行募補足數復

飭自強軍馬步砲隊各營加添哨隊沿江各砲台添招專勇暨撫標蘇防太湖水陸等營增募勇夫加給

新餉並添招權字等十九營二哨以及奉調赴北赴晉等軍應需糧餉正雜各款均照楚軍營制准銷成案分別核實支給遵照部咨將原存新募各營有無增減開具季報清冊咨部查核各在案茲據金陵防營支應局兼辦報銷事務江甯布政使李有芬等詳稱自光緒二十六年正月起截至是年十二月底止支過正雜各款現經督同委員逐款清釐綜計舊管上屆江蘇留防第二十八案報銷光緒二十五年底止實存銀二十四萬八千八百四十九兩有奇新收江蘇藩庫海關道庫兩淮鹽課鹽釐捐茶稅及准部撥鹽貨釐金並本案扣存製造平餘等項共計銀三百二十二萬四千三百一兩有奇錢二十一萬一千四百五十八千一百七十文內登除撥解鎮邊軍餉內務府金陵機器製造洋火藥等局外海水師船廠江南陸師學堂堤工等經費撫標練軍津貼江甯京口駐防捷勝營練餉清淮協餉並巡閱長江前四川總督臣李秉衡北上公費又採購軍米經費撥還江安糧道借款共計銀四十四萬四千三百三十九兩有奇又附列專冊請銷兩江督提鎮標新兵各營薪費津貼銀七萬九千七百六十六兩有奇錢二十萬一百二十四千五百三十文又附列專冊請銷沿江砲台專勇餉銀十四萬七千六百七十七兩有奇又附列專冊請銷洋操自強軍正雜餉項二十七萬六千八百十五兩有奇又附列專冊請銷募補各營哨官弁勇夫輪船水脚並北上各營車輛雇價等項銀五萬一千二十兩有奇又附請專案 奏銷江蘇留防水師各營修造船隻工料等項銀二萬五千四百四十九兩有奇實計收用銀二百四十四萬八千八十二兩有奇錢一萬一千三百三十三千六百四十文開除正雜各款遵照部議酌定軍需報銷章程

水師各部核銷計應歸戶部核銷銀二百十三萬五千四百八十七兩有奇錢一萬一千二百六十八千六百四十文兵部核銷銀一萬一千八百五十五兩有奇錢六十五千文工部核銷銀二十四萬五千六百四十六兩有奇統共請銷銀二百三十九萬二千九百八十九兩有奇錢一萬一千三百三十三千六百四十文實存銀五萬五千九十三兩有奇已於後案舊管項下接續造報等情詳請具奏前來臣等伏查此次江蘇造報留防海防水陸各軍遵照部咨開報花名清冊一切正雜各款概發湘平并扣一分平餘均係按照楚軍營制及屆期准銷成案實用實銷并無浮冒除飭將以後用款照章按年接報外所有江蘇留防軍需第二十九案收支欸目造冊報銷緣由理合恭摺具陳并繕具清單恭呈御覽伏乞

皇太后

皇上聖鑒飭部核覆施行謹

奏奉

硃批該部知道單片併發欽此

魏光燾片 再據辦理金陵軍械所江蘇候補道周家駒稟稱江甯省城華巖崗藥庫爲該所委員候補從九品吳天福兼管另派把總陳從謙專管本年閏五月二十五日亥刻該藥庫朝西屋內所儲各項無烟火藥忽然自燃轟燬庫房三間無烟等藥三萬六千餘磅幸看守兵役南北藥庫附近居民均未傷損等情正在查辦間又據統領駐防江陰合字營兼管砲台副將章其俊電稟江陰黃山後新火藥庫於六月十六日夜丑刻從無烟藥庫房起火燒去砲台各種火藥二十萬磅之譜庫房二十間餘無傷燬等語當經先後飭查起火之由並以藥庫接連失慎將周家駒章其俊撤差聽候查辦據查明該兩處藥庫起火之由皆因無烟藥性鬱熱勃發自燃所致勘驗被燬情形當時藥力上轟牆屋類多震塌幸無傷斃人

口查訊看守兵役並無別項情弊等情稟覆前來伏查無烟棉花等藥質性猛烈熱力過度往往無故自燃今江甯江陰藥庫轟燬適值天氣酷熱之時其藥性自燃實爲防範所不及惟所燬藥數較巨雖無轟斃人口該管員弁究屬疏忽咎無可辭所有江甯華巖崗藥庫兼統官江蘇候補道周家駒兼管官候選從九品吳天福專管把總陳從謙江陰黃山藥庫兼統官候補副將章其俊經管官候選從九品林振鏞相應請 旨交部分別照例議處以示儆戒除飭將此外藥庫力籌保險之法妥慎收儲外謹會同江蘇巡撫臣恩壽附片具陳伏乞 聖鑒訓示謹 奏奉 硃批周家駒等均著交部分別照例議處欽此

前清門侍衛山海關副都統奴才倭恒額跪 奏爲擲扣餉米不恤旗艱請 旨嚴催籌放以重兵食而資整頓恭摺仰祈 聖鑒事竊查山海關駐防旗營餉米向由山海關監督衙門在稅務項下開支其餘一半由永平府等屬七州縣徵收米石按照時價折銀以省解費俱先期解由山海關管糧通判呈請奴才衙門飭令各旗旗官按名散放循辦已久惟山海關兵丁素習刁悍每因歷任通判解款延緩致啓聚衆噪餉之事所以今年四月因通判雙奎病故米折之款不齊正當欸開放之間該兵丁等卽聚衆噪餉二次奴才懼刁風日長請 旨懲辦以除積習業蒙 硃批著卽嚴行懲辦隨時整頓以除積習欽此奴才遵卽懲辦噪餉首從 奏明咨部在案自此之後該兵丁等頗知畏法積習漸除奴才方思寬嚴相濟竭力整頓乃到今秋應放兵米之期奴才行文催兼署通判臨榆縣知縣馬慶麟定期開放以濟兵食而馬慶麟竟置不理有無的欸何日開放並不呈覆及七月杪新任通判丁功齡到任奴才復行文催放去

後旋據該通判丁功齡覆稱所有秋季應放之款俱被前通判臨榆縣知縣馬慶麟坐扣陳欸以致無項開放等因前來奴才卽據該通判呈稟咨行直督袁世凱轉飭該通判迅速籌欸開放等因在案奴才因旗兵待食孔急復行文催該通判丁功齡迅速籌欸定期開放以濟兵食而該通判於八月初十日復呈稱所有催放兵米一節已稟直督未奉批示無期開放等因呈覆前來奴才伏查永平府等屬七州縣徵折之欸旣不欠解而前兼署通判臨榆縣知縣馬慶麟膜視旗艱竟以秋季應放米折於交御之際任意挪扣以補不知何人陳欠之欸而該通判丁功齡竟不思職司何事僅借稟請爲詞不急設法籌放坐視畏威守法之兵嗷嗷待哺已恐難服其心况現值秋操正宜騰飽以資訓練不料挪扣者以坐留爲得計新任者借稟請以緩催似此因私廢公兵米無著開放無期該兵丁等稱貸無門枵腹之餘何堪驅策奴才目睹情形萬分焦灼惟有仰懇 天恩俯念旗艱或飭戶部墊撥抑或飭直督袁世凱迅速籌欸開放以濟急需出自 鴻慈逾格奴才世受 國恩具有天良急思設法整頓之際而兵食不接萬不敢膜視旗艱壅於 上聞是否有當臨摺不勝悚惶待 命之至除咨直隸督臣察照外所有挪扣餉米不恤旗艱請 旨嚴催籌放以重兵食而賞整頓緣由理合恭摺具 奏伏乞 皇太后 皇上聖鑒訓示謹

奏奉 硃批著袁世凱迅速籌撥欽此

陳璠片 再川省頻年苦旱今夏則霖雨連旬猶幸其害於稼穡者十二三耳惟五月以後渠河水漫溢綏定府城上而城口太平東鄉下而岳池合州江北此六七廳縣臨江田舍悉多淹沒六月間峨眉樂山

兩縣復有蛟水之患人畜並傷而尤以嘉陵江之漂沒爲重順慶及合州南部縣全城皆在巨浸之中幸一二日水勢全退閩中岳池定遠銅梁江北巴縣等或城外沮洳或鄉間汎濫淹斃戶口尙少而民居蕩析農田淹沒倉猝不可數計臣聞報電檄交馳並飭籌賑總局派員齎銀前往撫卹又令各有司動撥官粟募集賑金疊據覆陳賴此免於流亡次第均將復業其餘山水漲而毀鹽廠量其輕重給資安輯皆已迅速拯其昏墊故不致紛紛失所現在農商復集民情安堵堪以仰慰 聖主子惠群生之至意惟川省旱潦相繼公私匱竭今所持以全救者惟賑捐而已溯自去年九月前署督臣岑春煊電 奏開辦無如本省年年搜括銜監殊難生其歆羨即今歲益以常捐七項至今本省收者僅一二名而蜀民齒藉最衆春夏各賑支用浩繁悉賴前署督臣告災諄迫南北各省無不挪墊滙川徐待收捐歸欸現准各省收捐咨獎者十不及一若照部議常賑兩捐均以去年九月爲始轉瞬一年期滿不獨賑荒未畢水患踵興前後所虧從何彌補而各省之懸欠甚鉅尤不能以截止爲詞茲據辦理籌賑總局署藩司黃承暄留川差委主事羅度等詳請展限前來相應 奏懇 敕部准將常賑等捐再展一年將川省本年彙咨捐案由部早爲核覆將來如勸募仍無起色尙須援照山東等省續請頒發空白執照方有以副捐生之望藉資鼓舞理合彙報水災一併附陳伏乞 聖鑒訓示謹 奏奉 硃批著照所請該部知道欽此

長順等片 再吉林營制餉章現經奏定每年共需餉銀一百二十萬兩由本省自籌一半全賴當地籌捐裘成集腋值茲大亂初平元氣未復固不敢征及瑣細擾累闔闔而於大體無損有取之而不爲虐者

亦當量爲權征以裕帑餉茲查有距省相近之缸窰鎮居民以燒窰爲業所製缸罈盆罐出產甚盛行銷甚廣現經派員試辦按每賣價中錢一千抽捐五十六文計一年所入似於餉需不無裨補亦不致有累商民至吉林省城街道向用木坭鋪墊年久失修凹凸不平現值交涉日繁俄人之在省駐紮者固以行走爲艱而各國游歷之士亦接踵而至每以平治道塗爲請因思路工亦王政之一端自應及時修理無如工用繁鉅庫儲空虛艱於籌措惟查有省城及外屬各處載運糧石貨物車輶絡繹於途如按所套牲畜之多寡酌收捐資以之撥作修路費即可永慶康莊儻有盈餘仍行撥充兵餉並請照章提扣一成五經費以資辦公除飭經征之員認真稽征不准稍有需索留難一俟收有成數再行咨部外理合附片陳明伏乞 聖鑒謹 奏奉 硃批知道了欽此

長順片 再花翎三品銜 特用直隸州知州程德全爲原任黑龍江將軍恩澤奏調赴江差遣之員才猷練達局度安詳上年夏間奴才因三姓辦理善後交涉諸務需人適該員措貲來吉當經咨留派令前往曾於光緒二十八年八月二十八日附片陳明奉 硃批知道了欽此欽遵在案三姓庚子之變受禍甚烈財用旣極困乏民物又復彫殘百度廢弛幾難措手該員受事以來兼辦籌餉緝捕及清理詞訟保護江關各事宜均能力持大體操縱因心除暴安良商民悅服甫及一年收歛至十六萬千有奇而所辦外交一事尤能推誠接物以信相孚故能中外翕然是其才力實有大過人者伏查該員程德全以諸生起家贊襄戎幕懋著勳勤歷經原任盛京將軍依克唐阿保薦由捐納府經歷洊陞知縣直隸州知州皆

荷 特恩超擢是其才猷久在 聖明洞鑒之中而其堅忍卓絕險阻備嘗尤在黑龍江一役當二十六
年之時事起倉猝迨奉 旨修戰而已寇深事亟強兵壓境已至博爾多阿將軍派往議和該員短衣匹
馬毅然首途面見俄將額林於夫與之定議不攻城鎮不傷生命不奪財帛卒得要領而還嗣俄將逼令
接授將軍印信該員義不爲奪以死相拒竄身入江救護得免雖俄人亦欽其風采俄皇至欲識其人始
令前赴俄京中道折回復傳令派兵沿途護送回江維時俄敗盟省城糜爛室空如洗人不聊生該員復
設法籌維竭力挽救向道勝銀行息借銀欸七萬兩益以呼蘭副都統衙門公欸銀三萬兩設立便民會
向上海購辦貨物買遷有無該員親赴海參威答爾濱等處接運輾轉數次百貨流通民以大蘇而操奇
計贏除歸還息本外尙盈餘銀二萬一千九百餘兩悉以繳還公家不名一錢此署將軍薩保所以有堅
苦卓越胆識過人之奏雖蒙 聖恩加銜進秩並奉有山將軍綽哈布到任察看是否卓著勳勞中外翕
服卽行據實具奏之 明諭特以綽哈布調任荊州未能察看覆陳幾遭湮沒幸江省爲奴才桑梓之邦
且壤地毗連戚友往來時相稱道該員之勤能人無間言是其卓著勳勞中外翕服實無疑義現在辦理
三姓善後諸事又復成効昭彰有用之才奴才何忍安於緘默用敢據實臚陳可否仰懇 天恩俯准將
花翎三品銜 特用直隸州知州程德全送部帶領引 見聽候 破格錄用之處出自 鴻慈逾格謹
附片具陳伏乞 聖鑒訓示謹 奏奉 硃批程德全著送部引見欽此

督辦墾務理藩院尙書銜新授綏遠城將軍奴才貽穀察哈爾都統奴才奎順察哈爾副都統奴才魁福

跪 奏爲遵案擬留察哈爾右翼八旗官兵缺地暨各佐公共牧地以恤蒙艱恭摺仰祈 聖鑒事竊奴才等籌辦察哈爾左右兩翼各旗墾務曾經先後 奏明酌予各蒙旗官弁兵丁隨缺地畝及各蘇木公共牧地等情奉 旨允准在案惟此項缺地牧地如何分別撥留前以未據該旗將各蘇木官弁兵丁詳數及有無未墾之地大概數目呈報到齊未能據行核辦現兩翼墾務各局清丈將竣約知地數並已查明每旗大小蘇木若干每蘇木官兵若干呈報前來自應遵案將缺地牧地詳定章程分飭撥留查察哈爾蒙地附近直晉遵廳各旗私放得租久已計不在牧特蒙情雖變蒙俗不殊芻牧之求固宜早爲之所牧地一項擬每整蘇木酌留十二頃半蘇木及半中之半蘇木減撥一半計每蘇木六頃牧地與墾種之地不同不必區別肥瘠亦不必拘定一處但水草相宜或與蒙營相近截長補短儘可照擬撥給如本蘇木地皆已墾盡或不敷撥給之數卽於左右附近各蘇木另行劃補以免向隅如此撥留足敷牧放並擬俟兩翼地畝丈竣時如有苦寒磽确不堪耕種之區在何旗界內擬卽留給何旗此酌留公共牧地之辦法也其隨缺地一項查察哈爾官兵等俸餉無多日艱一日此後地歸官辦無復自私自利之謀若不恤身家寬爲籌計將使資生無術難免失望之心擬仿照吉林烏魯木齊奏撥缺地成案酌量稍加總管每員給地八百畝正參領每員給地六百畝副參領每員給地五百畝整蘇木之佐領每員給地四百畝半蘇木及半中之半蘇木其佐領每員均給地三百畝滿蒙理刑官每員給地二百畝總管下及整蘇木之前鋒校護軍校每員給地二百五十畝筆帖式及額設補盜官每員給地二百五十畝半蘇木及半中之

半蘇木其前鋒校護軍校每員給地二百畝筆帖式及額設捕盜官每員給地一百五十畝至各蘇本額設兵丁有大小錢糧之別今撥留缺地應分別辦理馬兵每名擬給地百畝步兵每名擬給地六十畝各捕盜兵如係額設每名亦給地六十畝此酌留缺地之數若撥留辦法一須統劑其平一須預防其弊各蘇木官兵缺地應各由本蘇木劃留惟內有地已私放淨盡無地可撥者若遽由他蘇木撥補是有餘地之蘇木反因撥地於人致官局少放地若干卽該佐亦少得四分經費之利而無地者既早獲盜賣之價又同得養贍之田等量齊觀殊非公允不得不量予裁減微示之罰此項無地可撥之蘇木擬照現定應得各項缺地數目減半撥補並須俟有地之原蘇木先將本佐官兵缺牧撥留完竣再以餘地分撥免致喧賓奪主之嫌如備撥之地仍有不敷則擬由升科之四釐另租項下以租抵補每畝撥若干照正賦一分四釐核計若地雖未及放盡而所剩之地不足現定缺地之數尙缺若干亦於另租項下折米抵補如尙缺十頃補以五頃之租餘可類推於薄罰之中仍寓體恤之意此酌劑其平之辦法也蒙人唯利是圖罔知後顧此次所撥各項缺地係爲該官兵等永資養贍將來生計全恃乎此若不預爲之防難保該官兵等不仍前私賣擬自撥定之後由奴才奎順衙門查照立案並飭由各該旗將撥留數目詳造細冊送由奴才貽穀鈐蓋關防發存各旗遇有官兵遷調將此缺地算入交代不得稍有含混至缺地撥給官兵或自行耕種或招佃分收悉聽其便惟不允私行變賣無論是官是兵如有營私盜賣盜典及假託永祖不賣之賣致令地非其有一經奴才奎順衙門查出或別經發覺官則參處兵則革除其私買之人亦與

私賣者一併懲辦仍追奪原地歸旗如此嚴立防閑庶可永遠遵守此預防其弊之辦法也以上牧地缺地無非惠恤蒙旗應請 旨准免其押荒升科以廣 皇仁而紓蒙困至世職一項襲不得多寡靡定原不以缺論未便一律給以業田擬俟墾務辦清於該各旗應得四分辦公經費內如有餘儲每旗提銀千兩由墾局移交就近地方官發商生息按年以所得息銀由地方官查取該旗世職員名數目並孤寡蒙民幾戶均勻給予俾貳津貼卽人數加多亦祇均分此項他如各廟香火地畝須確查舊有頃畝若干有無別項輻輳由官局理清准其照章管業惟勘丈動需經費擬令照章繳納押荒一半以濟公用至升科擬請寬免俾其以常年租項藉資養贍齊其政不易其俗亦輯安蒙衆之一事也其餘應須劃留之地如考驗軍政操場各衙署四圍空閒均擬察度情形一併預行劃撥除分咨戶部理藩院查照外所有擬留察哈爾左右翼八旗官兵缺地暨各佐公共牧地情形是否有當謹合詞恭摺具陳伏乞 皇太后 皇上聖鑒訓示謹 奏奉 硃批著照所請該衙門知道片併發欽此

督辦墾務理藩院尙書銜新授綏遠城將軍奴才貽穀察哈爾都統奴才奎順察哈爾副都統奴才魁福跪 奏爲察哈爾左翼墾務成效過半謹先陳明辦理情形並擬將出力人員懇 恩准予援案請獎以資鼓勵恭摺仰祈 聖鑒事竊察哈爾左翼旗地奉 旨會同一律開墾經奴才等以該各旗之土地肥磽界城廣狹及已墾未墾可留可放情形必須逐加查勘方可切實核辦當由奴才魁福親帶員弁司書出口週歷所有廂黃廂白正白正藍四旗及其間之王公馬廠台站羣牧各地均經一併勘明大致並由

奴才貽穀等前往白塔山勘劃晉界一面在張家口設立墾務總局咨行○隸督臣飭將張獨多三廳舊有押荒各局截清原放地畝已收押荒數目於奴才等奉旨籌辦左翼全墾之日卽行停止其未完事宜移交該局接辦以一事權復卽體察情形會籌辦法仍擬照右翼現辦章程奏明一律辦理在案查左翼地方遼闊袤延二千餘里可墾地畝應較右翼加多而羣牧台站錯雜其間王公各廠猝難辨認加以豪霸商戶不肖蒙民半買半賣習爲固然或一地而放之數人或一案而延之數歲私墾越墾界址混淆新荒舊荒彼此鞣轄地數雖多於右翼弊端亦無殊於右翼當飭調熟辦墾務之存記江蘇卽補道陳際唐等督率各員司分起勘辦統自光緒二十四年續放未結之地入手分投滿丈以資清理而利推行一面由該局招領生熟各地催收新舊押荒並作兼營事同創舉計自上年六月會籌辦理以來至十月初一日始行開局暢辦今尙不及一年該局共丈過舊地二千九百餘頃新地一萬七千二百餘頃共計丈清二萬餘頃內除舊放地二千九百餘頃不計外共已新放生熟地一萬三千五百餘頃按定新章每畝以三錢核計應收荒價銀四十餘萬兩再加未放荒地三千六百餘頃尙有應須選擇丈放之地除酌留缺牧各項地畝之外以後陸續招墾應收押荒數目當復不少祇以蒙地認墾商戶向無土著大抵皆內地貧民春來秋歸待耕而食其應納押荒銀兩專候秋成不能不分限催交藉紓民力往歲口外收成歉薄報領寥寥押荒銀本無從徵繳而設局之始已在冬初舊墾未清新墾何能招放所幸今年歲收中稔現已實收銀八萬餘兩此後領地納價自當踴躍於前此左翼墾務成效過半之實在情形也伏查○

隸兩次開辦左翼官荒馬廠地畝於光緒八年奏結一次計放地八千餘頃二十四年復行續辦截至上年五月底止張獨多三廳押荒各局僅放地二千九百餘頃押荒復未經收齊此次該四旗蒙地暨王公馬廠已墾羣牧台站各地既一律擴充開墾較之以前僅辦空閒廠地隨報隨開者情形迥異難易尤屬不同惟念在事出力各員或分司勘丈或綜核簿書或勘判訟爭或測量圖繪罔不奔走於朔漠荒寒之域辛苦墊隘靡敢定居今者阡陌相望草萊廣闊羣策羣力微勞誠不可沒前次奴才貽穀奏報右翼墾務成效過半擬請援照奉天大凌河牧廠熱河圍場開放荒地請獎成案異常勞績分別奏保此次左翼事同一律合無仰懇 天恩俯准將出力各員援案擇尤酌保以資鼓勵之處出自逾格 鴻施所有辦理察哈爾左翼墾務成效過半擬將出力人員援案請獎各情形理合恭摺會陳伏乞 皇太后 皇上聖鑒訓示謹 奏奉 硃批准其擇尤酌保毋許冒濫欽此

貽穀等片 再察哈爾各旗之地比年以來經該官兵等互相串賣各便身圖有將該地私放淨盡幾無尺土者再遲數年蒙衆托足無所矣幸及今時歸官勘辦爲之清舊墾理新墾糾葛一清復蒙 皇恩優渥准予酌留各項缺缺地畝奴才等此次擬撥辦法係經體察情形爲各旗寬籌生計如果該各旗官兵恪遵法令永遠奉行以後缺放有資養贍不缺何莫非百年樂利之貽惟蒙情嗜利每扭於售地得財之故智希冀頓生今雖已安定章程難保不爲無厭之求妄行爭執除曉示各旗官兵聽候辦理外俟前摺奉 旨允行即便派員分行勘撥責成總管參佐等官會同切實遵辦倘有不肖官兵從中狡抗或該管

官有主使蒙衆滋鬧情事一經查明擬即從嚴參懲以儆效尤而維蒙計謹附片陳明伏乞 聖鑒謹
奏奉 硃批覽欽此

河南巡撫兼管河工事務臣陳夔龍跪 奏爲豫省兵力太單一時無款添練懇 恩飭撥毅軍營哨以
靖地方而禱大局恭摺仰祈 聖鑒事竊照豫省地屬衝要兵力太單臣到任後瀝陳大概情形業經據
實 奏明在案惟是界連七省路礦繁興交涉之案日多伏莽時虞竊發非有一枝得力勁旅彈壓梭巡
設有疎虞在畿輔則爲門戶之憂在豫省則爲腹心之患臣猥以愚陋仰荷 聖明眷遇重寄忝膺受事
以來夙夜圖維難安寢饋不得已思一變通辦理之法以期統籌兼顧敢爲我 皇太后 皇上敬陳之
查甘肅提臣姜桂題所統毅軍爲宋慶舊部而食豫餉當時同武衛軍奉 命出省征剿前撫臣錢鼎銘
卽有腹地不宜虛調回本省駐紮以作活兵一奏嗣在北洋海防多年一應餉糈豫中源源協撥自光緒
二十七年每月復加撥新餉銀一萬兩隨同舊餉搭解此軍現歸提臣姜桂題總統總兵郭殿邦分統近
紮南苑原備隨時策應之需刻值 朝廷銳意整軍直隸督臣袁世凱文武兼資節節布置籌辦不遺餘
力約計北洋各軍何止七八十營兵力本厚而豫省爲中原綰毂拱衛 神京籓籬之備稍疎卽根本之
虞益大若於毅軍內劃撥數營填紮豫境不特大河南北聲勢頓壯日爲近畿各營盈布遠勢洵足以協
輔車之義而增錯壤之防臣與袁世凱往返面商並商之姜桂題彼此意見相同擬撥毅軍步隊三營馬
隊一哨交郭殿邦統帶來豫歸臣調遣其每月加撥新餉銀一萬兩卽照原案截留就近在豫搭放此外

留駐南苑尙有八營足資策應所需舊餉仍按數由豫協解似此變通辦理餉不須另籌兵可資其久練且在直在豫無非權衡緩急計及通盤一轉移間亦與前撫臣錢鼎銘請留勁旅以作活兵一奏後先膺合相應請 旨飭下袁世凱姜桂題轉飭郭殿邦迅帶毅軍步隊三營馬隊一哨來豫填紮實屬有裨大局出自 高厚鴻慈如蒙 俞允應俟奉 旨後分別咨行欽遵辦理除隨時體察情形容由臣續行具奏外所有豫省地方緊要兵力太單一時無款添練籲懇 天恩俯准調撥毅軍營哨緣由謹恭摺具奏伏乞 皇太后 皇上聖鑒訓示謹 奏奉 硃批准撥毅軍步隊三營派張柏泰帶往餘依議欽此

陳夔龍片 再准直隸督臣咨擬將蘆鹽新案加價由直隸兩岸商人通力合作每年包繳銀二十四萬兩於光緒二十九年六月二十二日奉 硃批著照所請戶部知道欽此當經欽遵轉飭司道核辦茲據署糧鹽道胡翔林會同署布政使鍾培詳稱豫省抽收此項加價專爲湊還賠款關係重要今既改爲隨引包交若由長蘆運庫核收始行解汴復由汴滙滬不惟徒多周折且恐延誤限期再四思維擬按照二十三年蘆商包交運庫之款徑解滬關成案將此次包繳運庫之加價銀二十四萬兩統歸直隸按月先期湊撥經解滬關彙收劃抵河南應解賠款其豫省現征蘆鹽加價本應截至七月底止第查蘆商包繳之銀係屬按月勻攤之款本年連閏截至七月底止計八個月應攤加價銀十四萬餘兩核計目下收數截至本年七月底止所短尙鉅如援照二十三年成案則所短之數應由運庫照補解滬且查豫省應解

賠款業已照章解至九月分爲止此次蘆商包繳運庫徑解滬關之款應以十月分爲始計改章停收加價以後尙有八九兩月之款亦應由運庫解回直省以符每月包交二萬兩之數惟值此蘆商困苦正在加意體恤之時應將加價一款查照舊章按季截數辦法展期至九月底止截數結報所有長蘆運庫庫徑解滬關之款亦卽預解以十月分爲始如此通融辦理蘆商既不至籌措爲難豫省亦不至要款無著惟是河南奉籌新定賠款以鹽斤加價爲大宗茲因體恤蘆商改由運庫包收實屬萬不得已其餘洛淮東三綱概不得援以爲例且查直省來文有商力復元銷數暢旺再行酌加之語日後蘆鹽暢銷仍當另議加價不得僅以暫時包繳之數爲定額等情詳請奏咨前來臣覆加查核行豫蘆鹽實占全省引地過半若按斤核計由豫經徵多銷一引之鹽卽可多加一引之價現既歸蘆商包繳豫省已受虧於無形該司道所議各節意在展期以清界限撥抵以顧要需議日後之酌加原冀商銷之暢旺杜他綱之援例以期償款之有著皆係體察豫省情形及體恤蘆商起見合無仰懇 天恩俯准敕部立案施行除咨暨直隸兩江督臣查照外謹附片具 奏伏乞 聖鑒謹 奏奉 硃批戶部知道欽此

督辦墾務理藩院尙書銜新授綏遠城將軍奴才貽穀察哈爾都統奴才奎順察哈爾副都統奴才魁福跪 奏爲察哈爾左翼四旗墾地日廣體察情形應行移添廳治以資治理而固邊防恭摺仰祈 聖鑒事竊維開墾所以實邊安邊必先置吏察哈爾兩翼八旗所屬郡縣蒙古而左翼尤密邇畿輔屏蔽北門當振興邊務之時尤應預爲因地制宜之計左翼原設三廳曰張家口曰獨石口曰多倫諾爾多廳自駐

口外張獨兩廳則借駐口內之萬全縣赤城縣境計該三廳所轄向祇招墾升科之地附近何廳卽歸何廳治理從前地土荒蕪人烟稀少事尙簡而易理然一遇命盜詞訟各案輒待拘質於數百里外不惟駐口內之張獨兩廳大有鞭長莫及之勢卽多廳亦以地段袤延不無顧此失彼之慮况現在左翼各地業經放墾過半計縱橫千有餘里其間漢蒙錯處民教雜居轆轤事件日多一日若再將新墾之地分附三廳而張獨兩廳仍駐口內幅幘旣廣周顧愈難口外商戶半多四方不逞之徒霸佔強爭動輒械鬪兼以馬賊土匪出沒無常搶劫之案所在多有調兵往捕兵至則遠颺兵去則復聚官力不足其勢然也夫聚民以闢地設官以治民事本相宜而起自非移添廳治不足以規久遠而策治安現旣墾地日廣戶口日繁保教輯蒙安氓捕盜在在均關繁要奴才等體察情形似宜將原設張家口廳獨石口廳均移駐口外適中之地便民就治並宜於附近直晉新界地方如大搭拉老虎山等處擇設一廳以控制西北又張獨之間如閃電河均係衝要處所或再酌添一廳或設分防於吏治邊防實屬有裨查上年山西護撫臣趙爾巽奏請於察哈爾右翼添設陶林興和各廳業經奉 旨允行在案左翼與右翼情事相同如蒙 恩准移添新舊廳治舉凡定治所劃疆界修署獄籌經費及興辦警察保甲各事宜擬由奴才奎順 陛見後就近馳赴天津與直隸督臣袁世凱詳細籌度再行請 旨辦理所有察哈爾左翼墾地日廣擬請將張獨兩廳移駐口外並擬添設廳治各緣由謹合詞恭摺具陳伏乞 皇太后 皇上聖鑒訓示謹 奏奉 硃批吏部議奏欽此

頭品頂戴兵部尙書銜山東巡撫臣周馥跪 奏爲籌撥撫標左右兩營勇餉以資軍食恭摺仰祈 聖鑒事竊查山東省於光緒二十六年因防務吃緊各路設防剿匪兵力不足經前撫臣袁世凱添募撫標馬涉八營分紮要隘以資彈壓官弁勇夫薪餉等項按照武衛右軍先鋒隊營制餉章在於海防捐輸項下支發均經 奏報在案嗣因防務稍鬆復經袁世凱 奏先後裁撤六營酌留左右步隊兩營應需薪餉仍在海防捐輸款內動支現在捐款截至本年六月業已支撥無存察看地方情形雖尙安靖而近來鐵路暢行礦務繁興中外工商紛至沓來彈壓巡防均關緊要方擬籌款添募以資保衛未便將已練之師遽議裁撤惟薪餉製造雜支等項歲需十萬餘金自應另行籌撥以資飽騰東省庫藏本屬入不敷出無從籌此鉅款臣與司道一再籌商查東海臨清兩關稅務疊次整頓收數較前稍旺約計東海關常稅及洋稅六成項下除額撥各款外尙有餘剩臨清關稅務以月前論亦可望其溢收擬請一併撥作撫標兩營月餉如或不敷再由臣在於司道各庫設法挪湊臣仍督飭兩關實力稽征以期無誤餉需據善後局司道詳請具 奏前來除咨部照並飭將收支銀數按年報銷外理合恭摺具陳伏乞 皇太后 皇上聖鑒訓示謹 奏奉 硃批該部知道欽此

周馥斤 再山東內地稅釐收數無多每年應撥餉需本屬入不敷出全恃徵收暢旺藉資挹注近來各省營局派委員弁採辦米糧物料等項經過東省關卡多有給發印照援案請免稅釐之事在各省因爲節省物貨起見第現值整頓稅務之時誠恐丁役船戶人等因執有免完印照夾帶私貨藉端影射不服

盤查暗中耗蝕稅釐實於餉項大有妨礙擬請嗣後各省採辦一切米料無論運往何處凡經過山東關卡均應一律照章完納稅釐不准援案請免其有緊要官物並賑米等項必須免完者應由各省督撫隨時奏明俟奉 旨允准先期咨會照辦並於印照內註明確數不准夾帶影射聽憑經過關卡查驗放行仍由各省所派員弁填具應完銀數清單交給關卡以憑報部不得僅給印照籠統請免查上年湖南安徽等省均已先後奏准在案東省自應一律辦理庶足以杜詐冒而免偷漏於稅釐不無裨益除咨部外謹附片陳明伏乞 聖鑒訓示謹 奏奉 硃批戶部知道欽此

頭品頂戴調補浙江巡撫臣聶緝熈跪 奏為皖省創設武備學堂練軍懇 恩飭部立案恭摺具陳仰

祈 聖鑒事竊維時局日艱安攘之策首在講求武備况疊奉 諭旨諄諄更未敢視為緩圖皖省防練

各營雖已改習洋操惟各勇類多椎魯之夫徒襲外觀未能深造有得查武備學堂所習外場功課與營中操法本屬一致該堂優等學生經臣一再考校技藝均有可觀若創設一軍隸於該堂以講授兵法教練技藝等事任諸畢業學生收效較速而該學生等歷練有賞亦可望蔚成將才與司道熟籌擬招募勇丁三百名以身家清白文理粗通而又體質強壯不染習氣者為合格即作為皖省武備學堂練軍編成左右兩隊該堂提調譚學衡與武備教習鄭祖年彭毓麟均熟諳東西兵判能耐勞苦即以譚學衡為統帶鄭祖年彭毓麟為管帶並以畢業學生分任哨弁營書等職責令該統帶督率認真訓練限以一年畢業復擇其藝術精熟明白戎機者或派往各營充當弁目或挑入武備學堂肄業或仍留營練習高等技

藝其餘發回原籍聽候調遣營中缺額另行招募似此更番募練則餉不添籌而可得多兵之用與德國征兵之法亦相符合所有建造營房及開辦經費約銀一萬餘兩又常年餉糈及添支各項約須銀二萬數千兩擬由籌議所於蕪湖米捐項下撥解轉發統帶具領撙節支用核實造報一切營制餉章教練課程悉令參照江南湖北洋操章程辦理除飭該統帶刻日招募成軍督率認真訓練期收成效並分咨軍機處政務處暨戶兵二部查照外所有皖省擬創設武備學堂練軍緣由謹會同兩江總督臣魏光燾恭摺具陳伏乞 皇太后 皇上聖鑒敕部立案施行謹 奏奉 硃批該部知道欽此

聶緝梨片 再據兼理武備學堂布政使聯魁詳稱安徽省武備學堂光緒二十四年冬間開辦當時草創經營規模粗具二十六年將原額學生四十名增至八十名添聘教習加購器械量爲擴充遂核定學堂常年經費每月銀一千一百兩每年共銀一萬三千二百兩置辦軍裝書籍儀器各項活支每年約用銀七八千兩上年添招學生多延專門教習加給脩膳膏火等項原定額支均屬不敷仰蒙批准常年經費按月加給銀四百兩每年共准支銀一萬八千兩各項活支經費一切較鉅應請隨時酌量情形擇要添購每年支用不得逾一萬兩之數詳請 奏咨立案前來伏查安徽省武備學堂需常年活支兩項經費疊經前撫臣奏請在防軍項下支給在案先後兩次擴充學生已較原額加增至一倍有半所有教習薪膳學生膏火日用各項軍裝器具無不逐一加增規模較大將來成就自必較多皖省雖帑項奇絀斷不宜惜此區區爲僅顧目前之計所需常年經費應請卽以一萬八千兩爲定額活支經費每年不得逾一萬

兩之數仍照案由支應局在防軍項下陸續撥給以資應用除咨戶部查照立案並飭該堂仍隨時撙節動支核實造銷不得以定有額數稍涉浮冒外理合附片陳明伏乞 聖鑒敕部立案施行謹 奏奉 硃批戶部知道欽此

頭品頂戴署理漕運總督江蘇布政使臣陸元鼎跪奏為整頓標營舉辦巡警以期有裨實用謹擬大概辦法恭摺仰祈 聖鑒事竊查設立標營原所以折衝禦侮乃數十年來屢勘大亂其功不出於兵而出於勇現在海防邊防與巡防內地要隘亦無一不為勇營同是人也豈其為勇則強為兵則弱蓋以額餉輕微兼營他業則心力不專循例操演寢成具文則實用無濟兼之官弁差遣莫辨公私徒效奔走之勤幾忘軍旅之事緣營陋習積久相沿無惑乎兵同虛設為世詬病矣上年欽奉 諭旨裁汰制兵改為巡警經前兩江總督劉坤一奏明裁減兵額酌加餉項除去馬戰守名目月餉不分銀米每名給銀二兩四錢什長給銀二兩九錢總不及勇糧之優而較之原定之額餉則已加厚亟應乘此衆情鼓舞之際改為巡警認真整頓庶可挽頹風而策後效惟是各國警察之政備極精詳其才必出於學堂其權儼侔乎官吏若遽使華兵為之不獨非其所能且恐易滋流弊即各省現辦警察章程類皆造端闕大用項殷繁亦非叢爾清淮所可幾及臣維巡警以兵即周官詰姦禁暴之意似宜從弭盜入手果其行之有效方能漸及精深不揣固陋謹擬辦法六條為我 皇太后 皇上陳之一巡警須由近及遠也查漕標向設七營在淮城內外者四在海州鹽城者三擬將在淮四營先行舉辦俾在外各營有所矜式此次裁兵案內漕

標中營存兵一百二十名城守營存兵三百四十四名皆駐城內右營存兵一百三十二名駐紫城外統
共四營存兵七百四十六名除先已調練及書識各糧外其餘悉令充巡警軍不准該管將弁留署服役
昭核實俟辦有端緒再將海州鹽城東海三營一律推廣一巡警須分班更代也外洋用人之法無論
晝夜皆限以時所以均勞逸防怠惰也現辦漕標巡警宜仿其意凡城門圩門以及緊要道口繁劇街衢
劃分地段派兵駐巡晝則盤詰姦宄彈壓強梁夜則各處梭巡緝捕盜賊分爲數班更番交替按地之遠
近兵之多寡派員管攝以專責成而杜推諉一技藝須練習優嫻也巡警雖非戰陣可比設遇兇匪拒捕
亡命鬪爭卽與臨敵無異况盜匪率多驕捷高屋闊溝所不能限若兵丁技藝生疏心思拙滯豈能遇案
破獲應令精勤練習以洋槍取準爲主以拳勇超絕爲輔平日各自精練按期列隊合操賞其優者而教
其不及屢教不能則黜之不稍寬貸一營規須整齊嚴肅也從前綠營之兵不與民事猶或有欺壓鄉閭
藐視官長之弊今改爲巡警則稽查彈壓排難解紛處處與民交涉况各國教堂所在多有尤宜平心相
處力爲保護應令該管官弁時時訓誡曉以設兵衛民之意務使恪遺紀律兵民相安倘有桀驁不馴騷
擾閭閻以及酗酒賭博等事輕則責革重則治罪如其失於覺察或意存徇庇亦卽分別撤參並令地方
官一體嚴束不准膜視一解犯護餉仍應簽派也查前兩江督臣坤一原奏請免解犯護餉經政務處議
由各督撫另核妥辦臣查治兵之道宜勞不宜逸今將標營改爲巡警已無征調之煩解犯護餉逐站交
替計程不遠爲時甚暫與巡警似可並行若並此不派未免過逸則生怠非兵所宜應照舊簽派藉以經

歷風霜練習勞苦一信賞必罰以資策勵也向來閱兵之賞罰祇憑技能不計功過片刻之短長升沈立判僥倖而得屈抑而失恐皆在所不免今改爲巡警則當分別勸懲技藝之優劣於合操定賞罰平日之功過按一月定賞罰獲盜有賞縱盜有罰窩盜與盜同罪其有被拒傷亡者照章給賞請卹此外彈壓稽查救火治水諸雜務果係勤勞出力亦卽量予獎勵賞不濫施罰無倖免以一衆心而嚴軍紀以上六條臣謹就管見所及悉心酌擬俟加餉核定開放卽當以次試行所需器械帳棚號衣旗幟等項容臣設法籌挪擇要製備惟清淮經費素絀開辦維艱既不能如各省之專設學堂卽不能如外洋之包羅衆務祇以江北地方最患盜匪是以就其顯著易知者首先舉行以符巡警之義所慮事理無窮情形不一必有及之而後知試之而後改者臣仍當與文武官紳隨時討論務期精益求精有利無弊以冀仰副朝廷除莠安良之至意所有整頓標營舉辦巡警以期有裨實用擬議大概辦法緣由謹會同兩江總督臣魏光燾恭摺具陳伏乞 皇太后 皇上聖鑒訓示謹 奏奉 硃批知道了仍著隨時認真整頓務期有裨實用欽此

甘肅新疆巡撫西林巴圖魯臣潘效蘇跪 奏爲新省南北兩路改設府州縣及添設廳縣丞應修衙署壇廟倉廩監獄及官役廉費俸工等項分別仍舊增新酌設經費數目懇 恩飭部立案恭摺仰祈 聖鑒事竊照新省南北兩路改設增設各府廳州縣縣丞經前撫臣饒應祺奏明經部議准奉 旨欽遵咨行到新臣到任後飭司委員勘分增設各處界址辦理就緒已將正佐各缺陸續揀員委署隨時 奏

咨在案所有應支官役廉費俸工以及增設廳縣各衙署壇廟倉廩監獄等項經費銀兩均應分別籌畫酌設數目值此款項奇絀尤必可省卽省只期足資辦公不敢稍事鋪張查疏勒莎車溫宿三直隸州改升知府三州吏目改升府經歷庫車直隸廳同知改爲直隸州知州瑪喇巴什直隸廳通判改爲知州兩廳照磨改爲州吏目以上改設正佐十缺衙署壇廟倉廩監獄毋庸興修廉費俸工等項一概照舊亦毋庸增減莎車州屬新設蒲犁通判新設澤普縣現另案奏請改名皮山縣疏勒府屬新設伽師縣和闐州屬新設洛浦縣溫宿府屬舊城巡檢升設溫宿縣柯坪添設縣丞焉耆府屬布告爾巡檢改升輪台縣卡克里克縣丞改升塔羌縣庫車直隸州屬新設沙爾縣早康縣屬之濟木薩縣丞改升孚遠縣吐魯番廳屬闐展巡檢改升鄯善縣共計九縣各添設典史一員以上添設正佐二十缺新衙署經費正署酌發銀三千二百兩佐署酌發銀五百兩監獄酌發銀三百兩總共以四千兩爲度其舊有縣丞巡檢衙門之處或改作正署或改作佐署減去銀五百兩此係酌定大數以期辦理歸於畫一仍飭令切實撙節統由各該委署人員核實估報興工不准浮冒分釐一俟工竣卽委勘結報造銷歸善後項下開支至應修倉廩須就糧數多寡估報壇廟須就地方情形籌辦均由地方官酌定具稟請示飭辦蒲犁通判應支官役廉費俸工仿照霍爾果能通判章程開支惟該處並無稅釐又與英俄接壤常多交涉事件擬再加公費銀四百兩添設九縣應支官役廉費俸工銀兩地面歸北路鎮迪道屬者卽照阜康縣章程開支歸南路阿克蘇喀什噶爾兩道屬者卽照拜城縣章程開支其應支公費銀兩除鎮迪道伊塔道各屬仍照舊支發

外阿克蘇喀什噶爾兩道各屬額支公費銀七百兩有另加增公費銀六百兩者抑有未加增者擬將未加者仍支原額凡有加增者各減去銀二百兩新設之缺支額定公費銀七百兩外又加增銀四百兩溫宿縣屬新設柯坪縣丞呼圖壁巡檢改升縣丞應支官役廉費俸工仿照前濟木薩縣丞章程開支以上總共歲支銀四萬五千六百九十九兩零除裁改各缺原缺抵支銀四千二百九十餘兩尚須添支銀四萬一千餘兩作爲前項動支不另請欸以符原案據署新疆布政使李滋森署鎮迪道兼按察使銜慶秀會詳請 奏前來臣覆核無異除將各屬應分界址戶口錢糧圖冊仍由該司等遵案彙詳咨部查照外相應開具養廉俸工清單敬呈 御覽仰懇 天恩飭部立案謹會同陝甘總督臣崧蕃恭摺具陳伏乞 皇太后 皇上聖鑒訓示謹 奏奉 硃批該部知道欽此

頭品頂戴兼署湖廣總督湖北巡撫奴才端方跪 奏爲鄂省紳民完納賠欸捐銀兩援案籲懇 天恩遇科准加鄉試中額以昭激勸恭摺仰祈 聖鑒事竊查鄂省新案賠欸前經本任督臣張之洞會同奴才將簽捐改爲賠欸捐督飭司局飭令州縣各就地方情形籌辦抵補其抽捐之法以申票爲大宗而鋪捐亦居其三四奏奉 諭旨允准欽遵辦理伏查湖北本係中省非他省繁富可比近年以來解欸日增庫藏久絀關稅丁漕等項歲入之數撥解多有定欸已難供本省支銷奉派新案賠欸較之湖南近省多至五十萬兩民力困窮地方瘠苦驟攤鉅欸籌措尤難然期限甚嚴稍一羈遲動致貽誤全局幸通省紳民洞明大義忠愛性成咸曉然於此項捐輸係屬萬不得已無不共體時艱勉圖報效計光緒二十八年

收賠欸捐銀四十九萬七千餘兩本年捐數亦皆按月解清豫計至年底較之上年當必有盈無絀通共
每年收銀約計五十萬兩成效昭然實奴才始願所不及此皆 朝廷深仁厚澤久治民心亦由紳民紆
難毀家形爲風俗故當物力凋敝之餘咸能踴躍急公歲輸鉅欸得以按期滙解無誤要需是鄂省紳民
因事效忠不違私計實較他省爲難查同治十三年部議捐輸加廣中額章程一省捐銀至三十萬者准
推廣一次文武鄉試中額各一名又光緒二十七年四月部議四川督臣奎俊奏川省紳民捐輸鉅欸請
照章加廣鄉試中額一次奉 旨允准近雲南撫臣林紹年以滇省按鹽隨糧捐輸請照每三十萬兩加
廣文武鄉試一次中額各一名又以武科已停請併入文鄉試辦理業經奉 旨飭部核議茲鄂省紳民
按年捐輸賠欸銀兩與滇省鹽糧捐事同一律且與川省成案亦屬相符合無仰懇 天恩俯准敕部立
案將鄂省紳民完納賠欸捐銀兩按照捐銀三十萬兩推廣文武鄉試一次中額各一名章程併爲文鄉
試中額二名以資觀感而勵捐輸出自逾格 鴻慈如蒙 俞允應俟每年銀數收齊截數後由奴才核
明應廣額數報部于下屆舉行正科時辦理至長餘銀兩仍俟下屆併計據署湖北布政使岑春煢會同
善後局司道通詳請援案具奏前來謹會同湖北學政臣胡鼎彝恭摺具陳伏乞 皇太后 皇上聖鑒
敕部議覆施行再湖北巡撫係奴才本任毋庸會銜合併陳明謹 奏奉 硃批該部議奏欽此
奴才台春跪 奏爲烏拉庚子壬寅兩年餉銀指撥長蘆鹽課項下既經戶部將該年課銀議准全數豁免
免自應速行改撥有著之欸以濟兵食恭摺覆陳仰祈 聖鑒事竊查打牲烏拉自庚子之後計今三年

半之久僅由閩海關及直隸藩庫提收二萬五千兩春秋餉銀既不能發放而辦差捕貢經費無從攤扣枵腹從公力實難支其苦不堪言狀及官員性丁四千餘人嗷嗷待哺大有朝不謀夕之勢曾經奴才專摺奏請 飭下戶部體察情形撥發以濟窘困等因現奉戶部議覆仍令直隸總督轉飭藩運兩司查照歷次奏咨各案迅速籌解毋任延欠等因於光緒二十九年七月初三日覆奏奉 旨依議欽此欽遵咨行前來伏查奴才閏五月間赴京 陛見於六月初二日請 訓後乘火車出京順道天津曾派差赴長蘆運司衙門催提應解餉銀緣運署二十六七八年正課帑利等款業經直隸總督奏明於本年二月間

蒙部議准全行豁免所有該三年京餉照豁免解其京奉各餉俟二十九年春方能報部候撥等因奴才驚悉之下曷勝焦急是烏拉計口授食四千人養命之要款早成畫餅伏思長蘆收還引地戶部洞悉綱商疲累情形遽將數百萬兩課帑悉行豁免具見部臣格外優待蘆商無微不至無如該款內尚有應協烏拉之餉銀五萬餘金實爲一部旗僕生靈通年糊口之資既不能同入豁免尤未便膜視歧觀置爲緩圖然闔屬官員性丁仰望戶部恤商之仁政量加周濟速籌改撥以拯凋敝似不致獨令烏拉窘上加累苦於胡底合無仰懇 天恩飭下體念烏拉疲困情形准將各年餉銀速行撥發謹將庚子等年餉銀分款逐層聲叙另繕清單恭呈 御覽所有部豁蘆課應解餉銀請速改撥緣由理合恭摺具 奏伏乞

皇太后 皇上聖鑒謹 奏奉 硃批戶部議奏單併發欽此

奴才增祺志彭跪 奏爲奉天改設添設府州縣各缺業經委員試辦成效漸著謹將應行籌擬各事宜

繕單恭呈 御覽請 旨遵行恭摺仰祈 聖鑒事竊上年臣增祺與府尹玉恒因奉天省幅員遼闊盜賊多有審度時勢非弭盜不足以安民舍量地添官分司治理亦別無緝盜安民之策當就合屬地方情形酌擬請將新民廳同知升爲新民府海龍廳通判升爲海龍府將康平縣之鄭家屯主簿改移石頭井於鄭家屯添設遼原一州仍隸昌圖府管轄分甯遠州之率後所添設綏中一縣仍隸錦州府管轄分廣甯縣之小黑山添設鎮安一縣於邊外養息牧場添設彰武一縣並添設哈爾套街分防縣丞一員均隸新民府管轄又於大闡塲東西流水新開荒地分設西豐西安東平三縣並將通化縣之柳樹河縣丞裁撤改設柳河一縣均隸海龍府管轄將通化縣之帽兒山巡檢移駐八道江於帽兒山添設臨江一縣將懷仁縣之通溝巡檢移駐岔溝門於通溝添設輯安一縣均隸興京撫民同知管轄又劃省城附郭之承德縣轄地之半添設興仁一縣以資分治奏奉 諭旨飭由政務處會同吏部議准先行試辦並令將未盡事宜隨時奏請 欽定等因於光緒二十九年六月十五日具奏奉 旨依議欽此欽遵咨行到奉當經陸續遴委委員分駐試辦一面派員會同將界址戶口錢糧妥爲勘查詳細區畫除原擬西安縣建治之老虎嘴子僻在一隅已經改移大興鎮得居中控馭之宜又原擬移駐石頭井之康平縣主簿現已改駐後新秋地勢較爲扼要其餘均照原議界限一律劃分清楚先後稟報前來臣等伏維建置之經期於盡善變通之道端在因時計自量地添官以來地方日見繁庶商民亦皆安堵旣成效之漸著自長治之宜圖如別繁簡以定缺分設學校以維風教支廉俸以便辦公築土圍以資捍衛建衙署以崇體制鑄印

信以昭信守諸大端現經參考舊章悉心酌擬繕列清單給具輿圖一併呈覽恭候欽定以便遵行其未盡事宜容再隨時奏明辦理所有改添府州縣各缺籌擬各緣由謹會同奉天府府丞兼學政臣斐維倭合詞恭摺具陳伏乞皇太后皇上聖鑒訓示謹奏奉硃批該部議奏單併發欽此

增祺片 再此次改添各官事關創始需費繁多當茲款項萬分支絀之際自應設法分籌辦理庶可次第經營除派委試辦正佐各員廉俸暨夫役工食等項銀兩尙未議定以前均經奴才增祺由河防船捐等項通融湊辦按月分別酌給津貼經費以資辦公並未動支正款惟修建衙署監獄等項工費仍約需銀十萬餘兩暨將來修築土圍款項均請由續收東西流水荒價項下陸續核發以便及時興修統俟彙

案造報作正開銷用歸核實除咨部外謹附片陳明伏乞聖鑒謹奏奉硃批知道了欽此
護理貴州巡撫兼署提督布政使臣曹鴻勛跪奏為黔軍收復廣西南丹土州所有在事出力文武員弁遵旨擇尤保獎以示鼓勵恭摺仰祈聖鑒事竊於光緒二十九年三月十九日游匪竄陷南丹土

州經前撫臣鄧華熙電奏於四月初三日奉軍機處電傳諭旨鄧華熙電奏廣西南丹地方游匪陸亞發分股竄擾土州失陷已電廣西迅即赴援並飭黔軍會同夾擊等語昨據王之春電奏邊界內地一律肅清何以南丹有股匪竄陷土州之事著王之春迅即派營撲滅收復毋稍粉飾曹鴻勛已接護撫並著嚴飭黔軍認真會剿隨時據實電奏欽此當即恭錄飭知邊防將弁越境扼紮俟粵師到境即行認真會

剿並電催廣西撫臣迅速派營前來以收夾擊之效嗣據中路統領徐印川呈報中路後營張紫雲奉派

進駐粵之巴定場於五月初十日至巴定會同土州莫泌督率團練前進行至灣村地方探聞游土各匪約六百餘人分伏山谷截擊我軍當即分派迎敵該匪蟻湧而至槍彈如雨團勇傷九名練軍傷七名勢幾不支該管帶激勵士卒躬先督戰自午至戌斃匪甚夥直至夜分匪始敗退至龍蜡場屯紮次日該管帶復督率弁練往攻龍蜡場匪衆抵死相拒互有傷損十六日進紮並哨連日分兵四出搜剿南丹附近匪寨十九日攻克龍蜡場二十四日攻克黃江場二十六日攻克羅富哨先後擒獲游土匪首莫吉第莫景惠黃占元蔣老有莫吉濫黃元復譚金和莫松山黃福生莫少生賴大之莫鳳魁莫三之等十餘名均經訊明正法以快人心而寒賊膽二十八日進紮雍里探悉南丹新到游匪悍目麥子二率領黨羽七八百名謀襲我軍該管帶恐爲所制乘機先發二十九日分撥各隊直攻州店與匪鏖戰於龍王坡我軍奮勇轟擊斃匪百餘名始行奔潰各弁練追至丹廂延壽寺深入匪伏陣亡哨弁朱楚元李天祿二員練勇陣亡三十餘名幸哨弁李裕泰晏維光率隊繼至冒圍突入援出各軍退至晚騰村扼紮以資休養於閏五月初三日簡料各軍進紮央哨適中路前營李之峯率隊馳抵巴平卽與函商我軍久駐粵境師老糧盡恐爲所乘不如併力進取以圖收復約定初六日辰刻率隊直逼丹州以李之峯爲接應該管帶張紫雲督同中營哨弁李裕泰范榮華由中路攻入以右營哨弁唐玉春彭玉成左營哨弁余洪勝黃鑑源各率所部分兩路抄襲護理土州莫樹貞粵紳莫鴻猷莫駿業黎芳春陳有陶等各帶團勇分路並進匪等鎗炮環列相持轟擊約一時之久我軍愈戰愈厲擊斃悍匪以數百計左右兩路復抄出匪復奮力掩殺

匪等腹背受敵相率奔潰遂於是日未刻將南丹土州收復初七至初十等日乘勢搜捕近村土會各匪擒獲游匪悍目班吉憂李老古並土匪首張兆發等十數名正法示衆一面令該土州安輯難民歸理農業現在游匪退踞河池八墟一帶俟粵軍到境卽約同認真夾擊各等情先後呈報前來當將迭次接仗並收復南丹大概情形隨時電奏並請擇獎出力員弁以示鼓勵在案於閏五月二十三日准軍機處電傳奉 旨曹鴻勛奏克復廣西南丹土州情形等語出力員弁着准其擇尤保獎欽此仰見 聖明垂念邊隅微勞必錄防營將士聞 命歡呼莫名欽感臣查廣西南丹久爲匪踞黔之獨荔緊與偪處粵民負載而來絡繹不絕溷匿竄擾防不勝防屢奉 諭旨飭令派兵會剿以粵軍久未到邊未能深入此次南丹紳民再三哀懇援救荼毒蹂躪慘不忍聞所派張紫雲各軍屢中匪伏幾爲所乘幸賴 天威遠播將士同仇鄉團効死竟以一旅客軍掃清丹境所有在事文武員弁實屬異常出力不無微勞足錄茲據中路統領已保總兵徐印川開單請獎前來臣逐加查核將勞績稍次各員一律汰去現計請獎文職十一員武職十員繕具清單恭呈 御覽合無仰懇 天恩俯念此次深入粵境收復南丹剿辦尙屬得力賞准照單分別給獎以示鼓勵出自 逾格鴻慈除將干把以下各弁另冊咨送兵部查核辦理外所有黔軍收復南丹請獎文武員弁各緣由理合會同署理雲貴總督臣丁振鐸合詞恭摺具陳伏乞 皇太后 皇上聖鑒訓示謹 奏奉 硃批該部議奏單併發欽此

護理貴州巡撫兼署提督布政使臣曹鴻勛跪 奏爲黔省屯衛請免改裁擬酌撤百戶小旂以節經費

而重苗疆恭摺仰祈 聖鑒事竊卷查兵部咨開光緒二十八年正月十七日內閣奉 上諭各直省衛所屯田原爲轉漕贍運丁而設自南漕改爲海運以來屯衛弁兵半成虛設此項田畝私行典賣輾轉轉轉弊端日出着漕運總督陳夔龍會同有屯衛省分各督撫將各省屯田地畝逐一澈底查明令該屯戶報官稅契聽其管業將屯田餉改爲丁糧統歸州縣官經徵如有盜賣私售者亦飭據實報明完納正供不究既往更須嚴禁胥役需索苛擾此後屯丁運軍名目概行刪除其原設之衛守備衛千總等官並著裁撤改歸營用等因欽此當經前撫臣轉飭司道查核妥議詳辦在案茲據署藩司全懋績署臬司袁開第糧儲道凌卿雲詳稱遵查賓州屯衛自雍正年間勘定苗亂撤軍歸農卽以各屬苗寨逆絕田產分授屯耕安設八寨一衛清江丹江台拱各兩衛雜處群苗寒落之中用資鎮壓意至深遠乾隆初年復添設古州兩衛松桃一衛合計十衛額設屯軍九千三百餘名每軍一戶給上田六畝中田八畝下田十畝每戶年納京米一石二斗四升以十軍爲一甲設小旗一名五十軍設一總旗百軍設一百戶每衛各設一千總領之經徵屯糧百戶每名年給食米十二京石總旗每年年給食米六京石小旗每年年給食米三京石每年百軍坐扣操練藥鉛京石米三石六升十衛分屬各廳統歸道轄於農隙時由該管官弁訓練操演講求武備卽以建威消萌有事調遣按十抽三一切口糧路費取給於未調之戶然各自衛本境總不出境應調所以備苗也每年開支坐扣外餘米仍照征糧章程由各衛弁變價解繳藩庫作正開支核與漕標衛所專司漕運者不同惟此項屯田自經咸豐年間苗變軍民逃徙強半荒蕪肅清後雖漸次規

復然原額糧多迷失若必重事清丈田畝畸零魚鱗冊籍尙無可稽擾累糜費得不償失若改軍爲民則漢苗一例有失鎮壓本意若仍其軍名而獨裁衛弁又漫無統率若弁軍仍舊但將屯糧撥由地方官征解轉發不獨弁勇隔閡不屬稽查爲難又恐書役勒索致令騷擾搖動且苗性蠢愚最易搖惑稍失控馭輒煩兵力况值粵邊多事之秋奸民幸亂尤不宜輕事更張逐細體察當時之設衛弁及酌定屯軍屯糧具有遠慮裁改殊多窒礙於萬無可籌之中詳加審酌查十衛統計百戶四十餘名總旗一百七十餘名小旗約九百名現擬各衛屯軍仍循舊章俾各自食其力每五十軍留一總旗以備催征領操其百戶小旗名目概行裁撤計每年節省食米四千九百餘石仍由衛弁經征變解藩庫另欸存儲以備本省餉糈之用所有各衛千總仍請照常輪補以資統率等情會詳請 奏前來臣覆加查核黔本巖疆下游古州各屬概係苗民峒砦若裁去屯軍勢必增兵分戍轉恐地方多事該司道等會詳請 奏前來合無仰懇 天恩俯准飭部議覆施行除咨部查照外所有黔省屯衛請免裁改擬酌撤百戶小旗緣由是否有當謹會同署雲貴總督臣丁振鐸合詞恭摺具陳伏乞 皇太后 皇上聖鑒訓示謹 奏奉 硃批戶部議奏欽此

曹鴻勳片 再黔省因邊防緊要添募勇營餉項無著經前撫臣奏請開辦籌餉捐輸奉 旨敕部議准照五成收捐在案計自開辦以來迄今數月報捐寥寥收數無幾支發邊防營勇口糧及購辦軍械轉運等項不敷甚鉅近年捐事勢成弩末若不設法變通不足以資挹注伏查四川山東等省開辦賑捐凡銜

封貢監均照新章五成之數減至四成實銀照兌先後奏蒙 恩允黔省餉捐事同一律自應援照辦理
據籌捐局司道詳請具 奏前來臣覆查該司等所請均係實在情形合無仰懇 天恩俯念黔省餉需
竭蹶准照新章五成之數遞減一成以四成實銀照兌俾廣招徠以資接濟出自 鴻慈除咨部查照外
謹會同署雲貴州總督臣丁振鐸合詞附片具 奏伏乞 聖鑒訓示謹 奏奉 硃批該部知道欽此
奴才增祺志彭跪 奏爲奉省改設添設府州縣暨佐雜各缺試辦各員銜名謹繕清單恭摺具 奏仰
祈 聖鑒事竊奴才增祺前經會同府尹玉恒審度奉天時勢非除盜不足安民舍量地添官慎選賢能
別無弭盜清源之策將應添官缺繕具節畧奏奉 硃批着政務處會同吏部速議具奏單併發欽此旋
准政務處咨開量地添官一摺業經議准光緒二十八年六月十五日奉 旨依議欽此欽遵咨行前來
當將各府州縣分別選員前往試辦間有人地不甚相宜先後撤差另委計自試辦迄今一年業已成效
漸著所有應行籌辦各事宜現經妥擬另行具奏請 旨今將派委試辦各員銜名繕具清單恭呈 御
覽飭部備案再佐雜一項前因本省候補人員無多由部請撥本年四月間始經陸續到奉隨時札委合
併聲明除咨政務處吏部查照外理合恭摺具陳伏乞 皇太后 皇上聖鑒訓示謹 奏奉 硃批吏
部知道單併發欽此

今將奉省改設添設各府州縣暨佐貳雜職各缺試辦各員銜名謹繕清單恭呈 御覽
新民府 試辦府治事宜委員試用知府增韞光緒二十八年九月初二日札委 試辦經歷兼司獄事

宜委員擬補孤山巡檢袁宗淮光緒二十九年閏五月二十八日札委

海龍府 試辦府治事宜委員在任候補知府本任興京同知孫壽昌光緒二十八年十月十一日札委

試辦經歷兼司獄事宜委員本任金州廳巡檢章壽康光緒二十九年閏五月二十八日札委

遼源州 試辦州治事宜委員准補蓋平縣知縣劉廷珍光緒二十八年七月初一日札委二十九年七

月初六日撤委 接辦縣治事宜委員候補同知王安中光緒二十九年七月初六日札委 試辦典史

事宜委員委用典史郭光豫光緒二十九年閏五月二十八日札委

彰武縣 試辦縣治事宜委員試用知縣周士藻光緒二十八年四月十六日札委 試辦巡檢管典史

事宜委員委用州吏目祝鋒光緒二十九年閏五月二十八日札委 試辦哈爾套街分防縣丞事宜委

員委用州吏目袁占熬光緒二十九年閏五月二十八日札委

鎮安縣 試辦縣治事宜委員准補復州知州吳瞻莪光緒二十八年三月二十四日札委六月三十日

撤委 接辦縣治事宜委員在任候補班前知縣本任錦州府經歷馬祚愷光緒二十八年六月三十日

札委 試辦典史事宜委員委用典史譚肇榮光緒二十九年閏五月二十八日札委

綏中縣 試辦縣治事宜委員候補知州許彭齡光緒二十八年六月三十日札委二十九年正月初七

日撤委 接辦縣治事宜委員候補知縣程恩榮光緒二十九年正月初七日札委 試辦巡檢管典史

事宜委員本任中後所巡檢王兆垣光緒二十九年閏五月二十八日札委

東平縣 試辦縣治事宜委員候補知縣張兆駿光緒二十八年七月二十二日札委 試辦典史事宜
委員委用典史米嵩壽光緒二十九年閏五月二十八日札委

西豐縣 試辦縣治事宜委員試用知縣錢宗昌光緒二十八年五月二十六日札委 試辦典史事宜
委員委用典史馮毓芬光緒二十九年閏五月二十八日札委

西安縣 試辦縣治事宜委員試用知縣紹康光緒二十八六月二十七日札委 試辦典史事宜委員
委用州吏目張家翔光緒二十九年閏五月二十八日札委

輯安縣 試辦縣治事宜委員候補知縣裁缺柳樹河縣丞德凱光緒二十八年九月十九日札委二十
九年六月十九日撤委 接辦縣治事宜委員候補同知鳳鳴光緒二十九年六月十九日札委 試辦

典史事宜委員委用典史韓鼎勛光緒二十九年閏五月二十八日札委
柳河縣 試辦縣治事宜委員革留遼陽州知州陳衍庶光緒二十八年五月二十六日札委二十九年
閏五月初四日撤委 接辦縣治事宜委員准補金州廳同知范樹升光緒二十九年閏五月初四日札

委 試辦典史事宜委員委用典史魯樹勛光緒二十九年閏五月十八日札委
臨江縣 試辦縣治事宜委員試用知縣吳光國光緒二十八年七月初四日札委 試辦典史事宜委
員委用典史陳嘉玉光緒二十九年閏五月二十八日札委 鄭家屯移駐後新秋分防主簿 試辦後

新秋分防主簿事宜委員試用巡檢陳清祥光緒二十九年閏五月二十八日札委 通溝口移駐岔溝

京報輯要 卷七 二十五 九月念二日中外日報館附送

門分防巡檢 試辦岔溝門分防巡檢事宜委員試用巡檢徐士騏光緒二十九年閏五月二十八日札
委 帽兒山移駐八道江分防巡檢 試辦八道分防巡檢事宜委員委用典史李翰光緒二十九年閏
五月二十八日札委

陳夔龍片 再據署布政使鍾培署糧鹽道胡翔林詳稱豫省度支浩繁庫儲異常艱窘欲籌餉源之裕
幾無羅掘之方惟查民間釀酒本干例禁古人議行權酌亦因多釀傷穀隱示寓禁於征今欲無損於民
有裨於餉惟有議增酒稅尙屬籌欸之一端近年直隸督臣奏請抽收酒稅以裨餉需曾奉 旨允行在
案擬請仿照辦理但豫省販酒之戶生計式微非如直隸各屬燒鍋以鉅資開設若照直隸每斤抽收十
六文民力實有未逮轉恐窒碍難行應請分爲釀酒銷酒兩項釀酒之戶每釀酒一斤抽收加價四文其
有境內並不釀酒而運銷他處之酒者無論來自鄰境來自他省均於銷售之處每斤抽收加價四文其
征收之法應歸該管各州縣經理不另設局凡以節糜費而免紛擾現擬先行試辦一年俟奉文准辦之
日再行定章出示征收等情會詳請 奏前來臣查前准戶部咨行籌還賠欸條陳內本有茶糖菸酒四
項重徵尙無妨礙之語豫省用繁欸絀早在 聖明洞鑒之中自非設法籌維莫資挹注該司道議請抽
收酒稅雖取之釀販商戶實仍分攤於食酒之人所征無幾於民生不致相妨集少成多於餉需不無小
補即使各業戶因茲觀望而少釀一成之酒即可多餘一成之穀似於民食亦有裨益詳加察核事屬可
行合無仰懇 天恩俯准敕部立案一面由臣督同司道妥議章程分飭試辦仍俟試辦一年後察看情

形斟酌辦理除咨部查照外所有議抽酒稅助餉擬請先行試辦緣由理合附片具奏伏乞 聖鑒訓

示謹 奏奉 硃批戶部知道欽此

雲貴總督臣丁振鐸跪 奏爲滇省團哨變通班期並團保合一辦法擬懇 敕部立案以期經久恭摺

仰祈 聖鑒事竊滇省訓練團哨曾經前撫臣李經羲將章程鈔單分別奏咨於光緒二十八年五月二十四日奉 硃批該部知道欽此欽遵轉行遵照在案查原章係以三月爲一班合兩年半練足十班周而復始是每年既練四班不惟農忙不能停止而薪餉益爲不貲上年勦辦游匪次第增設廣西等處團營餉項無出不能不挹注鹽捐本年臨安事起遠近各州縣均添調團兵藉資防守而現在粵游未靖各處團營不特不能遽裁且時有增添之處計惟將團哨酌量變通以期兩有裨益臣等伏維團練本古者鄉遂制軍之法亦泰西民盡兵籍之規有應盡之職卽有應休之時不定年限不明等級則生計有碍暮氣易乘殊非持久之道今擬分團練爲三等一曰正戰團配以八成槍砲主本境隣境前敵殺賊之事一曰備戰團配以六成槍砲主本境隣境應援設伏之事一曰巡警團配以三成槍炮主本境偵緝巡察之事現在各屬練至五班者已屬不少卽開操最遲者本年底亦可練足五班此後卽自甲辰年起改爲每年訓練八個月以三個月練一新班已練之舊班五班各帶練一月俾技藝皆臻純熟農時不致曠廢合五年爲一等等按年練一新班退一舊班正退爲備備退爲巡巡退爲民共十五年而三等畢卽不在部勒之列然而舊班既各帶練一月後此若不過問仍嫌不免荒疎則復訂帶操之法將備戰團丁輪調帶操

二日除甲辰年五班全行帶練毋庸帶操外自乙巳年起調備戰之團帶操二日五年後頭班退爲巡警六班退爲備戰巡警則毋庸帶操仍備足五班爲止嗣後每屬卽永有三營之衆合通省已練之丁可得三百四十五營民兵十萬有奇是每屬已隱儲三營之兵而常年且不及一營之餉更嚴其賞罰以昭激勸待以禮數使異齊民挑優等者准拔補營弁予以出身數年之後民盡知兵遇有征調毋須招募自強之圖實基於此第團保不合一則挑丁不免紛歧退伍亦無約束今擬照保甲成法先行清查烟戶十家爲牌十牌爲甲十甲爲保保有長十保爲團團有正另選團總一二人以總其成均由地方報名公推以公推在八成以上者爲合式所有丁壯咸造入冊以後挑丁卽按籍而稽各鄉各爲一哨庶相習相親不虞隔閡練畢退伍仍歸保甲巡警一營既專主偵緝巡察之事尤應以保甲爲重平時守望相助盜警協力緝捕並責成盤詰奸宄清查匪類以靖地方如此則三時無害士氣常新減練節餉以處其常加練增餉以通其變團保相輔而行尤爲有利無弊矣據團練處會同雲南布按兩司善後團保各局司道具詳前來臣等覆查無異除將詳細章程開單咨部查照仍隨時察酌情形再行奏明辦理外謹合詞恭摺具陳伏乞 皇太后 皇上聖鑒敕部立案施行謹 奏奉 硃批著卽切實辦理務收實效欽此

奴才馬亮廣福跪 奏爲覆核伊犂歷年防戍出力武職各員仰懇 天恩俯准給獎 敕部註冊以示鼓勵恭摺具陳仰祈 聖鑒事竊奴才等於光緒二十九年四月初三日接准兵部咨開議奏前伊犂將軍長庚等奏保伊犂邊防出力員弁欽奉 硃批該部議奏欽此臣等悉心詳查此次奏保武職至一百

犂錫伯營廂藍旗驍騎校尼克瑞以上二員均擬請免補防禦以佐領補用 花翎儘先即補防禦額勒
德春伊犂索倫營廂紅旗防禦業在本以上二員均擬請以佐領即補俟補佐領後 賞加總管銜 藍
翎主事職銜伊犂糧餉處本處章京富里善主事職銜伊犂駝馬處本處章京豐紳泰以上二員均擬請
以防禦即補並 賞加四品頂戴 花翎總兵銜補缺後副將用儘先補用參將借補伊犂軍標左營都
司揆勇巴圖魯向得紅花翎副將銜補缺後以副將用儘先即補參將借補伊犂鎮屬霍爾果斯營左旗
馬隊中軍守備王保清以上二員均擬請免補參將以副將補用 花翎遊擊銜即補都司署伊犂軍標
分防守備周壽山花翎副將銜遊擊用儘先即補都司軍標開花砲隊千總謝興有署伊犂鎮標右營中
軍馬隊左哨把總補缺後遊擊用陝西即補都司周元遊擊用儘先即補都司軍標左旗左哨千總楊玉
清署軍標右旗右哨把總李萬年以上五員均擬請免補都司以遊擊補用 藍翎署伊犂軍標左營分
防守備張德霖擬請免補守備以都司補用並 賞加三品頂戴 花翎遊擊銜都司用儘先即補守備
軍標中營前哨千總王青龍軍標後旗左哨把總魏得勝軍標後旗右哨外委莊廷魁署伊犂鎮標中營
右旗馬隊左哨把總都司用儘先補用守備廖丙午鎮標差遣委員花翎留甘肅新疆補用守備馬高陞
以上五員均擬請免補守備以都司補用 拔補千總借補伊犂軍標開花砲隊把總榮金魁花翎都司
銜守備用儘先拔補千總軍標中營巡查外委孫開學花翎都司銜守備用儘先拔補千總借補軍標中
營右哨把總陳光生以上三員均擬請免補千總以守備補用榮金魁並請 賞加都司銜軍標差遣委

員守備銜儘先拔補把總李毓榮撥請免補把總以千總拔補並 賞加四品頂戴奉 硃批覽欽此
謹將酌保伊犁歷年防戍在事其次出力武職各員繕具清單恭呈 御覽

花翎二品銜伊犁錫伯營總管富勒祜倫擬請 賞給二品封典 花翎儘先即補總管伊犁索倫營副

總管伊勒噶春擬請 賞加二品銜 伊犁察哈爾營右翼副總管索托依擬請以總管即補先換頂戴

花翎儘先即補協領伊犁舊滿營正紅旗佐領穆特春花翎儘先即補協領伊犁舊滿營鑲藍旗佐領

德克吉圖以上二員均擬請俟補協領後 賞加二品銜 花翎補用總管伊犁錫伯營鑲紅旗佐領愛

新泰擬請俟補總管後 賞加二品銜 花翎伊犁新滿營廂白旗佐領扎隆阿伊犁新滿營廂藍旗佐

領內根泰以上二員均擬請以協領即補先換頂戴 花翎伊犁錫伯營廂黃旗佐領圖瓦恰那花翎錫

伯營正黃旗佐領薩拉蘇藍翎錫伯營正白旗佐領霍敏錫伯營廂白旗佐領額勒登泰藍翎錫伯營廂

藍旗佐領訥墨春伊犁額魯特左翼廂黃旗二牛录佐領朝喀額魯特左翼廂白旗頭牛录佐領巴圖蒙

庫額魯特右翼正黃旗頭牛录佐領綽吉普額魯特右翼正紅旗二牛录佐領布拉以上九員均擬請以

總管即補先換頂戴 補用佐領伊犁錫伯營正紅旗防禦訥依勒春擬請 賞加總管銜 花翎補用

佐領伊犁舊滿營正藍旗防禦達春擬請俟補佐領以協領補用 世襲雲騎尉伊犁舊滿營廂黃旗防

禦景惠花翎舊滿營廂白旗防禦色勒特衣藍翎舊滿營正黃旗防禦精吉那花翎伊犁新滿營鑲黃旗

防禦吉拉敏藍翎新滿營鑲白旗防禦額勒德合恩花翎新滿營正紅旗防禦西林泰以上六員均擬請

以佐領卽補先換頂戴藍翎伊犁舊滿營正紅旂世襲騎都尉景秀擬請俟補佐領後 賞加協領銜
藍翎儘先補用防禦伊犁舊滿營廂紅旂騎校蘇勒春花翎儘先卽補防禦伊犁新滿營正黃旂騎
校尙安泰卽補防禦索倫營廂藍旂騎校德舍春以上三員均擬請俟補防禦後以佐領補用先換頂
戴 伊犁舊滿營正白旂騎校巴彥烏圖新滿營正紅旂騎校貴達春藍翎五品頂戴新滿營廂紅
旗騎校伊綿布新滿營廂藍旂騎校國西春藍翎伊犁錫伯營正藍旂騎校佛羅春伊犁索倫營
廂黃旂騎校烏爾滾泰索倫營正藍旂騎校齊克塔善索倫營廂紅旂騎校業陳泰以上八員均
擬請以防禦補用 察哈爾營左翼廂黃旗頭牛彖騎校圖爾固特擬請以佐領卽補 六品藍翎儘
先卽補騎校伊犁舊滿營正白旗前鋒莫羅錦儘先卽補騎校伊犁舊滿營正紅旗前鋒校郭勒敏
儘先卽補騎校伊犁錫伯營鑲白旂委筆帖式錫拉紉阿藍翎儘先卽補騎校錫伯營正紅旂委官
固崇阿以上四員均擬請俟補騎校後以防禦補用先換頂戴 伊犁舊滿營正紅旂世襲雲騎尉景
和鑲紅旂藍翎世襲雲騎尉滿忠廂藍旂世襲雲騎尉策林多爾濟伊博泰以上四員均擬請 賞給四
品頂戴 六品頂戴伊犁印房經制筆帖式文明六品藍翎伊犁駝馬處經制筆帖式尙阿春六品頂戴
伊犁營務處委筆帖式業車春烏拉喜春六品頂戴伊犁滿營檔房委筆帖式安福喜喇布伊犁錫伯營
領隊檔房委筆帖式齊克騰額永謙六品頂戴伊犁察哈爾營領隊檔房委筆帖式舒津烏圖那遜錫伯
營廂黃旂委官班吉素六品頂戴錫伯營廂紅旂委官烏勒吉巴圖六品頂戴錫伯營廂藍旂委官依勒

口索倫營正白旗委官巴圖鄂奇爾額魯特左翼廂黃旗二牛泉委官諾斯圖額魯特左翼正白旗二牛泉委官布噶額魯特左翼沙畢納爾廂白旗二牛泉委官庫克信六品藍翎額魯特左翼沙畢納爾正藍旗頭牛泉委官碩拉克舊滿營廂白旗催總烏勒蘇正紅旗催總扎拉豐阿六品藍翎舊滿營廂紅旗催總三音布拉克新滿營廂藍旗催總舒呈春六品頂戴舊滿營廂黃旗領催那彥吉爾噶勒六品頂戴舊滿營正白旗領催富勒渾六品頂戴新滿營正黃旗領催通吉善錫伯營廂黃旗前鋒校巴爾本泰索倫營正紅旗前鋒校額爾格本業陳布錫伯營正紅旗空藍翎倭西本索倫營廂白旗空藍翎翰克巴圖索倫營廂藍旗空藍翎富珠隆阿察哈爾營左翼已裁正藍旗二牛泉空藍翎圖依袞額魯特左翼正藍旗二牛泉空藍翎巴達瑪以上三十三員均擬請以驍騎校卽補並請 賞給五品頂戴 軍標差遣委員花翎湖廣督標補用都司胡家學花翎遊擊銜山西撫標儘先補用都司張有才以上二員均擬請俟補都司後以游擊補用胡家學並請先換頂戴 洋操漢隊哨長花翎都司銜補用守備孫德輝花翎都司銜補用守備借補伊犁軍標中軍左哨千總張兆杰花翎都司銜補用守備請補伊犁軍標中營左哨把總朱德元軍標稽查委員花翎留甘肅新疆儘先補用守備何得仁藍翎補用守備周有鈞儘先補用守備孫佩九以上六員均擬請俟補守備後以都司補用何德仁周有鈞孫佩九並請先換頂戴 花翎四品頂戴儘先卽補千總譚光前擬請俟補千總後以守備補用伊犁 軍標右旗馬隊左哨把總阮光福擬請以千總儘先拔補並 賞加守備銜 五品花翎儘先拔補把總稽查委員徐桂芳藍翎拔補把總

借補伊犁軍標右旗馬隊右哨外委余啓發六品藍翎儘先拔補把總借補伊犁軍標後旗馬隊巡查額
外外委楊文華 以上三員均擬請俟補把總後以千總拔補並 賞加守備銜 藍翎五品頂戴儘先
拔補把總沈喜擬請 賞給五品封典奉 硃批覽欽此

馬亮片 再查伊犁所屬黑宰阿勒班兩部哈薩克自光緒八年接收伊犁時由台吉相岱們都頭目薩
三帶領三千餘戶投誠經前將軍奎順奏請准其內附設立頭目三名放爲額哈拉克齊並請 賞戴三
品頂翎於光緒九年七月二十八日奉 旨著照所請該衙門知道欽此前署將軍富勒銘額奏明請將
台吉千戶長每年酌給津貼於歲收租馬變價項下開支經部覆准有案光緒二十五年前將軍長庚查
明該黑宰哈薩克生齒日繁僅止千戶長三名管轄難期周密奏請添設千戶長二名並添設辦事筆帖
毛拉等各照章給予津貼工食銀兩由租馬項下支給於二月二十一日具奏四月十一日奉 硃批著
照所請該衙門知道單併發欽此欽遵辦理在案迄今又已五年該兩部哈薩生息日益繁庶前准管理
哈薩克事務索倫營領隊大臣志銳咨呈據該千戶等呈稱戶口衆多稽察難周請添設千百戶長以資
分管此次奴才於巡閱邊卡之便復借該管大臣就近勘明該兩部哈薩克共有八千九百餘戶丁口至
四萬五千餘名據稱黑宰一部除已有千戶長五名外應請再添設千戶長二名每名千戶長屬下應有
百戶長五十戶長等均請照章添派其台吉阿勒巴特原有馬耆戶口四百餘戶現已奏請承襲應將馬
耆戶口撥出令其自行管轄外有百戶長昆布拉特一名前因自帶四百餘戶由俄國投出經俄皇准其

作爲中民應賞給千戶長銜令其管轄投出之戶其阿勒班一部亦增有四百餘戶原祇設百戶長一名難資約束應請賞給副千戶長銜以便總理該部游牧事務並添設百戶長二名以資分管至所添千戶長三名應請照章每名歲支津貼銀六十兩所添千戶長銜一名副千戶長銜一名辦公需資擬請着照千戶長津貼之數酌減千戶長銜歲支津貼銀五十兩副千戶長銜歲支津貼銀四十兩由征收該哈薩克租馬變價項下支給不另請款奴才查哈薩克性情獷悍全賴責成大小頭目嚴加約束俾知守法就我範圍現在休養生息既增繁庶原設千戶長五名稽查難周均屬實情既據呈請分別添設惟有仰懇天恩准其添設千戶長三名千戶長銜一名副千戶長銜一名並於每千戶長屬下各添設百戶長五十戶長等頭目責令遞相管束俾各遵守法度歲支津貼銀兩亦請准其於歲收租馬變價項下支給如蒙 俞允俟奉 旨後卽當轉飭揀選充補撥往妥爲分管所支津貼按年照章造報註銷除分咨部院外謹合附片具陳伏乞 聖鑒訓示謹 奏奉 批着照所請該衙門知道欽此

河南巡撫兼管河工事務臣陳夔龍跪 奏爲查勘黃河兩岸河勢工程情形督飭妥籌修守回省日期恭摺仰祈 聖鑒事竊臣兼管河工事務應卽周歷兩岸督率道廳布置修防當將赴工日期附片奏報在案拜摺後卽於八月二十一日自省帶印起程由下南沿堤西上歷中河鄭中間至上南取道滎澤渡河而北先至黃沁次第馳抵衛糧祥河下北等廳通工履勘一週於九月初一日南渡回省查得南岸上南廳地居上游首受出山之水工程最關緊要現在滎澤汎河勢尙屬循順向鄭上汎頭堡胡家屯及五

六七八等堡大溜節節南圈掃壩在在喫重自交大汛以來此加彼塌廂拋幾無虛日幸連年添辦石工得資拋護之力未致遽生鉅險鄭中廳鄭下中牟兩汛臨黃工段綿長內鄭工大壩爲舊日金門尤加意防範現查鄭下汛六堡近年淤閉之工昨因溜勢圈注滙出舊掃多段又中牟上汛六七堡無工處所大溜亦已滙至壩前已飭分投籌備修守中河廳中牟下汛溜勢趨注頭二三堡及五八九等堡一帶內以八九堡特爲吃重掃段見蟄已飭加廂下南廳祥符上汛十七堡本係舊日險工前因大溜南圈存灘冲刷殆盡當經儲石備防近日勢已稍見輕緩迤下各堡亦俱平穩北岸黃沁廳唐郭汛攔黃埧自前年秋汛生險之後大河迄未外移日前掃段間有刷蟄業經隨時廂修該廳沁河官工尙稱穩固衛糧廳經管陽武封邱上下隄汛隄段雖長工程較簡現惟陽武汛月石壩迎溜關要餘皆順軌祥河廳祥符上汛十五六堡與下北廳祥符下汛頭二堡工段毗連每遇溜勢上隄則祥河掃壩吃重如大溜下卸則下北工程緊要本年白露以後祥河溜漸外移現在大河仍靠下北頭堡各壩及二堡一帶行走查看兩岸八廳掃段壩堦疊經加廂盤築大致均屬高整河流亦漸次見消指日卽屆霜降安瀾普慶堪以仰慰宸厪臣此次走行隄上體察工程緩急詳求修守機宜勘得石壩實較掃得力蓋掃以護隄得用在於一時壩可挑溜功效期諸永久倘能於兩岸鱗次多築石壩石堦則工程彌臻堅固近年雖已先就通工無如限於錢糧難以多運仍須分年接續拋辦相機添壩減掃以冀漸收節料固工之效茲將來年應辦石方按廳從寬派定數目嚴飭委員多備船隻及早分投趕運以濟工需一面將應辦石料按工核定確數分

飭各廳乘此新料登場上緊採購堅實堆儲一切應辦事宜均當督飭道廳各員實事求是悉心經理務期工歸實用款不虛糜以仰副 朝廷慎重河防之至意所有臣蒞任後查勘黃河兩岸河勢工程現在情形督飭籌備修守並回省日期各緣由理合恭摺具陳伏乞 皇太后 皇上聖鑒訓示謹 奏奉 硃批知道了欽此

奴才于珊跪 奏爲密雲駐防籌集經費先行設立蒙養學堂以樹根趾而育人才恭摺具陳仰祈 聖鑒事竊奴才恭讀光緒二十七年八月初二日 上諭作育人才端在修明學術著各省所有書院於省城改設大學堂各府廳直隸州均設中學堂各州縣均設小學堂並多設蒙養學堂切實通籌舉辦等因欽此並准京師大學堂頒發各項課程前來查密雲駐防八旗十六員佐領下舊設有官學十六座委因近年生齒日繁減成折漕物貴銀賤衆兵生計日蹙糊口尙在拮据若責令子弟攻讀實多力有未逮是以各旗官學入學之子弟率皆寥寥無幾惟查京師宗室覺羅八旗官學均已改設中小學堂密雲駐防生齒蕃滋教育尤爲急務奴才與協領等相商非改設學堂不足以培根本而隆作育迺經費浩煩一時難集鉅款擬將舊有官學擇其有名無實者悉爲歸併先行設立蒙養學堂三座因各旗幼童失學者多根柢尙淺又兼限於財力中小學堂之課程一時難以驟躋故先立蒙學以開風氣而立中小學堂之基礎其學生年在九歲以上十三歲以內每佐領下擇其聰穎者保送四名共定額六十四名三年卒業再傳六十四名作爲二班俟數年後經費籌足卽添設小學堂以蒙養學堂卒業學生升入所有章程悉仿

大學堂頒來蒙學課程辦理暫由本營延請品端學粹之士每學一人充當教習盡心教導綜其要旨厥有四端專宗孔孟以明人倫敦崇實學以端趨向講解禮義以厚風俗先行試辦以樹根趾有是學以立基上焉者固深悉無難其次亦陶鎔有具並派委協領章京等充當總辦監督提調等官其書籍先儘應需者購備已擇於九月初二日開學惟是興辦學堂籌款爲先密雲駐防除由部請領兵餉之外每年僅有八旗官學心紅銀八十兩別無絲毫閒款更兼官兵生計維艱鮮有殷實之戶奴才與協領等至再籌商無米之炊實難獲濟是以倡率各旗不拘數目量予捐助年餘以來集腋成裘只能捐銀一千一百兩繼承准盛京將軍增祺捐助學堂經費銀一千兩錦州副統秀昌捐助銀一百兩以上共捐集銀二千二百兩發商生息年可得利二百二十兩並舊有官學心紅八十兩常年經費已有的款三百兩除總辦監督提調等官均不開支薪水共教習三員每年開支束脩銀一百五十兩學生六十四名每名給膏火之資東錢一千每年需銀一百二十兩所有月課年課獎賞花紅每年需銀三十兩奴才仍與協領等悉心籌措俟有成數卽多設蒙學以資造就數年後籌有鉅款卽稟請大學堂揀派教習設中小學堂以期教成駐防八旗之通才仰副 朝廷百年樹人之至計所有密雲駐防籌集經費先行設立蒙養學堂以樹根趾而育人才緣由除咨報京師大學堂立案外謹恭摺具陳伏乞 皇太后 皇上聖鑒謹 奏奉 硃批管學大臣知道欽此

頭品頂戴兩江總督臣魏光燾頭品頂戴浙江巡撫臣聶緝棨頭品頂戴江蘇巡撫臣恩壽跪 奏爲江

浙兩省交倉漕糧改用車運虧耗過鉅擬請將津剝食耗等米免予隨正起運以資彌補恭摺具陳仰祈
聖鑒事竊據浙江糧道陸襄鉞蘇松糧道羅嘉杰會詳稱江浙兩省征辦漕白二糧歷屆由海運津向
用剝船運至通倉每石例支耗米一升一合五勺名曰津剝食耗原以津貼兩省運米折耗之用數十年
率由舊章船戶如有虧短卽以此項米石抵補自光緒二十六年南漕改用火車運京復用騾車運倉前
由蘇松糧道擬請將隨運經剝食剝等米全數留抵彌補火車騾車各項虧耗等情當經臣恩壽據情咨
准戶部倉塲督臣核覆前項耗米應令課正交倉另行援照由通運抵大通橋由橋運倉經紀車戶每石
准給一升騾車耗米江浙一律火車不另給耗者蓋以合同訂明保險應無短少故也至光緒二十七年
京倉接修鐵路經倉塲督臣檄行京沽辦運漕糧局委員江蘇候補知府鄧心茂浙江委員候補知府喻
兆蕃以今屆漕米由火車逕運太平倉驗收計程較近道路與在通驗收由剝船到壩情事相同從前通
壩並不開支耗米所有一切騾車耗米應令隨正交倉未便准其撥給等因自應遵辦以益公家乃試辦
車運已歷三屆雖經該道督率京沽局委員認真經理以冀無虧正供無如每屆運米事竣截數核計虧
耗竟不能免每石或虧一升至三四升不等推原其故米自塘沽上棧裝載火車一經顛播便有壓碎灑
漏之虞此火車之耗也鐵路合同訂明保險僅保意外之險如果米包不少卽係米無虧短其米色中之
如何暗耗並不過問又南漕到京後初用人夫抗運繼因驗米塲路遠兼用騾車拉運計自卸火車入棧
次早出棧抗上騾車至驗米塲抗下反復數次裝卸上下顛抗袋繩難免鬆寬米粒不無拋灑此又人夫

驟車抗運之耗也間有米色不純風篩折耗更多總之陸運之米較之剝運一水可通者勞逸懸殊消耗尤甚運費有限米耗難籌思維至再擬請將例設津剝食耗米石免予隨正起運留抵車運虧耗以資彌補正供如再不敷由道自行設措不再瀆請以示限制聯銜詳請 奏咨前來臣等覆核無異除咨戶部倉場督臣查照外謹合詞恭摺具陳伏乞 皇太后 皇上聖鑒敕部議覆施行再此摺係臣恩壽主稿合併陳明謹 奏奉 硃批戶部議奏欽此

頭品頂戴兵部尚書銜山東巡撫臣周馥跪 奏為籌堵利津縣境甯海庄黃河漫口情形並請截留本年漕折銀兩以資工用恭摺具陳仰祈 聖鑒事竊臣於八月二十五日出省勘工曾經 奏報在案查甯海庄臨海堰民向歸民修民守自光緒二十三年前撫臣李秉衡奏明改歸官守作為官堤惟堤薄河曲南衝北激歷年困於修防本年伏汎盛漲漫決後秋汎日漲一日大溜直射口門兩壩塌刷愈寬該處附近工尾本可留作分洩入海支河但置而不堵水無歸束必須展築大堤數十里遷徙村庄甚多工大費繁而漫水汜濫太寬築隄亦無從措手祇有先就口門堵塞俟合龍後察看情形如能籌出經費展隄退守再行相機妥辦前經臣督同臬司尙其亨等履勘丈量口門現寬一百五十二丈西壩水深二丈三四尺東壩一丈六七尺不等中洪三丈二尺約分正河溜七成現在節屆霜清急需購辦物料擇日興工惟深水進占工料軌鉅通盤核計約需經費銀四十五萬兩查東省向遇堵工皆係截留漕折京餉本年京餉全解武衛右軍兵餉祇有漕折一項不足三十萬兩擬請全數截留撥歸工用不敷銀十六七萬兩

山東司道各庫無可湊撥當此部庫支絀臣不敢請發部款擬於上年奏准之七項常捐收起款內並於加提州縣地糧盈餘勻撥湊齊惟本年漕折須至年底收齊緩不濟急未便坐待惟有就司道各庫勉強騰挪一面酌調先鋒營勇二三千名幫同工作藉省經費一面招集被水災民以工代賑臣當嚴飭在工司道各員迅速趨辦務期及早合龍以蘇民困而慰宸廑臣於九月初三日自甯海折回沿途查勘秋汛搶險現已漸次平隱沿河災民迭次賑撫均屬安謐其未被災之區秋禾收成豐稔臣於九月初六日回省清理諸事所有籌堵利津縣境甯海庄黃河漫口情形並請截留本年漕折銀兩緣由謹恭摺具

奏伏乞 皇太后 皇上聖鑒訓示謹 奏奉 硃批戶部議奏欽此

岑春煊片 再廣西營伍積弊以邊軍爲尤然榛莽之中未始竟無蘭芷查有補用參將張得貴樸誠勇敢平日見蘇元春所行不當恒面折其非其於士卒也與同甘苦嚴戒騷擾兵民愛戴匪徒畏之千總陸榮廷始爲游匪投誠數年以來剿辦匪徒較諸將尤爲出力而且約束嚴明所至地方絕無騷擾以上兩員經臣博加采訪衆口皆稱其賢惟因宗旨與蘇元春不同以故蘇元春抑之名位不顯聞現因蘇軍不可不裁不可急裁特飭張得貴等認真分別汰留改編十營即派該兩員分統俟武建軍到防後調入內地剿匪以除蘇元春二十年來所貽之患現值將才消乏之際如該兩員之能自振拔於積弊中者極爲人所難能可否懇 恩伏加獎擢以勵其餘實於廣西營伍不無裨益臣爲鼓勵將領收束軍心起見是否有當理合附片具 奏伏乞 聖鑒訓示謹 奏奉 硃批張得貴以副將補用陸榮廷著以守備補

用欽此

岑春煊片 再接准督辦廣西邊防候補京堂鄭孝胥電稱拔貢知縣趙榮章龍州廳人現充該廳暨南書院院長抗團通匪睚眦殺人積惡多端邊民切齒若非予以嚴懲不足以平民怨等語臣查廣西之匪大都汚吏迫之於前劣紳庇之於後以致蔓延漸廣民不聊生內地已然邊疆可想既據鄭孝胥查明趙榮章積多惡端相應請 旨將拔貢知縣趙榮章卽行革職提案訊辦以伸民憤除分咨查照外謹附片具陳伏乞 聖鑒訓示謹 奏奉 硃批著照所請欽此

岑春煊片 再臣前訪聞署廣西南甯府知府黃英采營私罔利民怨沸騰當經檄飭署左江道余誠格詳查茲據查覆黃英采包損不實致起羣疑雖辦理別項包捐有無受賄無人指實而烟絲行於每年認繳餉銀之外曾另送府署銀元二千五百五十元據該行商人梁金德李國祥韋汝椿等言之確鑿並述當時由府署傳出有非另交此項不許承充之語是黃英采有意需索信而有徵等情稟覆前來臣查監臨官吏求索所部財物者律准枉法論准枉法論者罪止杖一百流三千里此案黃英采藉端勒索行商銀元二千五百餘元係在枉法贓一百二十兩以上按律已應滿流廣西吏治疲軟貪鄙成風遇有所犯不可不從嚴懲處相應請 旨將前署廣西南甯府事候補知府黃英采卽行革職發往新疆効力贖罪以懲貪墨而儆效尤理合附片具 奏伏乞 聖鑒訓示謹 奏奉 硃批另有旨欽此

頭品頂戴兵尙書銜署理兩廣總督臣岑春煊跪 奏爲知州畏罪自盡遵例專摺奏 聞仰祈 聖鑒

事竊照臣前駐潯州訪聞象州知州廖俊浮折錢糧多殺無辜侵吞賑款藉端勒罰貪酷殊甚民怨沸騰常經檄行柳州府查得所聞各節大致皆有其事當將該員撤任行提至潯發交桂平縣先行看管一面再飭確查以憑參辦詎該員廖俊自知情罪頗重時懷憂懼旋據署桂平縣知縣王元鼎稟報廖俊尙有烟癖未便加禁於六月二十八日夜四鼓乘人睡後服烟自盡延醫灌救不效於二十九日辰刻身死稟請委員會驗屬實填格取結棺斂飭屬領埋等情前來臣查知縣以上如有自盡之案例應專摺奏聞此察撤任廣西象州知州廖俊貪酷已甚畏罪服毒自盡應遵例奏陳 聖聞仍俟催查貪婪確數酷虐確情再行擬議參辦至署桂平縣知縣王元鼎於奉檄看守之員失防自盡例有處分業於疎脫陳景華案內奏參革職摺問此案輕罪應請從其重科除柳州府查確稟報外理合專摺具陳伏乞 皇太后皇上聖鑒訓示再此案本係由臣糾察擬辦是以未會廣西巡撫銜名合併聲明謹 奏奉 硃批知道 欽此

岑春煊片 再查兩廣近年水旱爲災歲侵屢告廣西現值辦匪之際兼籌賑撫需款尤殷茲據花翎二品頂戴候補四品京堂張煜南以兩粵災區較廣備具賑款銀一萬兩呈請報効前來臣查張煜南籍隸廣東歷在南洋各埠總理商務會充檳榔嶼副領事遇有內地災賑屢經捐助鉅款上年廣東開辦武備學堂曾據報効經費銀八萬兩經前督臣陶模會同升任撫臣德壽奏蒙 賞給四品京堂候補茲據兩粵災賑需款報効鉅資是其在南洋篤念桑梓慷慨好義誠有足多查前四川建昌道黃毓恩記名道陳

光弼升任蘇松太道蔡鈞捐助賑款銀一萬兩歷蒙 恩准賞給頭品頂戴有案今張煜南事同一律合無仰懇 天恩俯准照案將花翎二品頂戴候補四品京堂張煜南 賞給頭品頂戴以示優異而昭激勸除將捐款飭局收存並行取張煜南履歷咨部查核外謹會同署廣東巡撫臣李興銳合詞附片陳請伏乞 聖鑒訓示謹 奏奉 硃批張煜南著賞給頭品頂戴欽此

岑春煊片 再署廣西提督雲南臨元鎮總兵黃呈祥自接署提督以來於邊防事宜毫無整頓以至太平歸順等處游土各匪充斥蔓延初猶以蘇軍驕悍整頓本難卽其辨匪無功咎總由於王之春意存敷衍乃近准署廣西提督丁槐電稱黃呈祥交卸時曾扣發各營旂幟號衣銀一千數百兩此外二十營之餉每月約共扣發銀七百兩有奇等語查黃呈祥身爲專閫大員值邊軍廢弛之餘匪黨縱橫之際不能認真整頓迅掃邊氛已屬辜 恩溺職猶復營私侵餉罔顧時艱若不據實嚴參何以儆效尤何以飭營伍相應請 旨將雲南臨元鎮總兵黃呈祥卽行革職永不叙用以爲侵餉者儆其扣發餉銀一欸亦經飭廣西營務處照數追謹附片具陳伏乞 聖鑒訓示謹 奏奉 硃批另有旨欽此

岑春煊片 再開復廣西候補道張蔭棠前經臣委令統領全省水師及辦理潯州轉運局事該道目擊桂省營務不振水師尤爲有名無實殫竭心力一意整頓並釐訂章程力洗從前敷衍粉飾之習廣西左右兩江向來匪黨出沒行旅戒心自該道接統水師以來時僅數月而劫掠之案較前頓少其辦理潯州轉運局事更復慘淡經營使各路防營應需餉械各屬災區應需銀米均源源接濟不致延緩誤事綜計

數月以來該道規畫一切昕夕不遑因是積勞致疾遂於七月二十五日在潯州營次病故伏念張蔭棠以舉人保舉知縣洊升道員歷任永福思恩武緣臨桂平南等縣所至有聲經歷任撫臣保奏在案先後剿辦各屬土匪復能約束士卒力遏兇鋒而其辦事認真操履廉正尤爲不可多得之員前經因案被議奉旨以同知降補復由臣奏懇開復原官該道感激馳驅誓以身報卒至朝夕焦勞一病不起現在西省百端待理臣失此臂助實深痛悼合無仰懇天恩俯准將開復二品頂戴廣西候補道張蔭棠照軍營積勞病故例飭部從優議卹以昭激勸出自逾格慈施除將履歷咨部外謹附片陳請伏乞聖鑒訓示謹奏奉硃批着照所請該部知道欽此

頭品頂戴護理廣西巡撫廣東布政使臣丁體常跪奏爲廣西賑捐收數甚微擬請各省廣爲勸辦就近咨部核獎以期迅速而濟急需恭摺仰祈聖鑒事竊照廣西上年因水旱兵災經前撫臣王之春奏請開辦虛銜封典翎枝等項賑捐嗣因捐生觀望不前又奏請仿照山東河工賑捐將常例項下免補本班分發指省等七項一體由廣西收捐以資賑撫奉硃批着照所請戶部知道欽此當經通飭本省各屬一律勸辦無如邊地瘠苦復值兵災捐務難望起色而派員勸募於內地各省則又以捐局林立皆能就近請獎早得部照獨桂省僻在南疆彙案造報展轉需時且獎冊寄京部照頒粵往返已萬餘里再將部照分寄各省難保無沈失之虞人情就易避難因此辦無成效現在廣西兵事正急賑款軍餉挪貸俱窮若不設法變通則賑捐轉瞬經年必致有名無實查光緒二十七年順直秦晉貴州等省開辦賑捐

由勸捐省分就近請獎迭經奉准有案茲據善後局司道援案聲請並印備三聯實收請先咨送直隸山西湖北等省爲廣西勸辦等情前來合無仰懇 天恩俯准援案由各該省督撫臣就近咨部核獎頒發執照庶捐輸可期踴躍用以接濟要需除分咨直隸山西湖北督撫臣查照辦理並咨戶部立安外謹會同署兩廣總督臣岑春煊恭摺具陳伏乞 皇太后 皇上聖鑒敕部查照再此外各省如續有代辦粵捐者由臣隨時咨明照辦合併聲明謹 奏奉 硃批着照所請戶部知道欽此

頭品頂戴兵部尙書銜署理兩廣總督臣岑春煊跪 奏爲會辦軍務大臣積勞病故懇 恩從優議卹並代遞遺疏恭摺仰祈 聖鑒事竊查會辦廣西軍務前貴州提督馮子材於光緒二十九年七月二十七日在南甯防營病故經臣電請外務部代奏在案茲據該家屬將所具遺摺寶請代遞並造送履歷前來臣查馮子材於咸豐元年以勇目剿捕股匪發刃之初卽能負傷殺賊無算由是轉徙數千里大小百餘戰收復各城剿滅股匪不可勝計迄今五十有三年矣前後援鄂援湘援粵援桂防江防海防瓊防滇剿髮剿捻剿苗剿黎又因越南之亂率隊出關至於四次歷著戰績均經各省督撫臣奏報有案而其功之稱於天下者則以前之鎮江後之滇南關爲最著海內稍知世務者無不知有馮軍矣方洪逆之踞江南賊氛其熾該故提督於咸豐六年旣渡江大殺賊於六合隨克浦口江浦遂南渡以攻抹陵關大破賊壘且戰且斬且擒賊爲喪氣其時僅 裨將耳而鋒銳已無能當七月復解金壇之圍七年五月連克溧水句容十一月遂克復鎮江府城鎮江者卽京口賊之所必爭各隘所倚以爲重者也從古吳越用兵以

京口爲四戰之地故鎮江存則旁近州縣有所恃以爲援鎮江亡則沿江各城一陷賊卽不可拔是非能克之難而守之爲難 文宗顯皇帝知京口重鎮關繫東南卽以該故提督辦鎮江軍務而髮捻大股先後圍攻悍賊之來動以數萬其時大局糜爛餉械俱絀羣寇方自皖自江自浙糾黨迭乘此竄彼攻其志不得城不已該故提督乃以饑疲數千之衆累次解圍擊賊能以一身獨撐危城不使金陵雨花台諸軍爲鎮江所牽綴論者謂沿江要險得以節次克復使成金陵大功者該故提督之力爲不少由來守將與戰將不同戰將以慄悍激疾慷慨赴敵爲能其功在於一朝夕守將則忍耐堅苦不爭赫赫之功必使賊之無瑕可蹈故二者往往不能兼該故提督力保京口四五年至克復金陵乃撤軍旣以能守聞於時矣而咸豐八九年之南北應援同治初年之力破丹陽一時戰將亦復罕與爲儔其後滇南關之役戰功尤偉臣維中國積弱固由文武分途兵學不講亦由立功將帥無事則貪戀祿位有事則瑟縮行間獨馮子材於軍務稍平卽乞病家居不慕榮利聞警赴援則力疾就道許以馳驅計前後二十年三請回籍七請開缺脩然淡然或以爲終于牖下矣臣夙知其惓惓之忱未忘 君國適以西匪方獗籲請 廷旨使出視師該故提督一奉 朝命投袂而前戰不反顧其與臣電商兵額猶援王翦六十萬之說將廣募三十營誓滅此虜以八十有六之年雄心猶昔臣方喜其氣足定亂不謂六月栗栗感觸舊疾迨臣遺藥遣醫則已無及矣該故提督治軍廉正性行淑均無愧古之名將卽其累次出關拊循士卒無衛青霍去病躡武冒功之念有馬援路博德行邊耐瘴之風宜其士卒傾誠與共死生今者中興宿將久已凋零而時事

方難長城又殞正不獨臣之共事一方感傷無已天下聞之亦必同深悼惜茲將該故提督生平志行略陳梗概其前後戰績之詳久已登諸章奏載在 方畧可否仰懇 天恩 特旨予謚宣付國史館立傳 敕部從優議卹並於立功省分及原籍地方建立專祠以彰忠藎該故提督前以歷著戰功蒙 恩賞穿黃馬褂太子少保尙書銜三等輕車都尉世職今查其長子相猷次子相賢均已早故三子相榮開缺廣西思順道四子相華浙江知府五子鈞江蘇同知六子銘鉞七子相焜候選教諭八子相榮選用州同九子相炎文童長孫承祥一品廕生應如何 量予加恩之處出自 鴻施除將該故提督履歷備錄咨部外所有馮子材在營積勞病故代遞遺摺並請優卹緣由謹恭摺具奏伏乞 皇太后 皇上聖鑒訓示謹奏奉 硃批另有旨欽此

頭品頂戴兵部尙書銜署兩廣總督臣岑春煊調署廣東巡撫升署閩浙總督江西巡撫臣李興銳跪奏爲請將粵省書院全改爲學堂並酌提各屬賓興學田等款以充學費恭摺仰祈 聖鑒事竊維興學一事屢奉 詔旨敦促舉行近來士氣日熾邪說詖辭日新月異後生末學惑溺日多尤非迅速廣設學堂範以 欽定章程不足以收經正民興之效臣春煊有見於此是以奏設兩廣學務處飭該處設立兩廣師範學堂以備儲教員並聲明該處辦法當注重德育以植其根基廣興蒙小學實業學以求其溥育撫臣興銳亦早見及適因奉 旨調任閩浙是以未及舉行惟是全省舉皆興學經費浩繁惟此財盡民窮籌款甚非易事臣等再三商酌計惟有將全省書院悉改學堂堂舍既稍其規模經費亦可資挹注不

敷之數先儘各原有之賓興學田及一切閒款酌撥應用倘猶不足始議他籌並將省城越華書院改爲學務處辦公之地如此一轉移間事不繁擾學可渤興庶無負 朝廷昌明正學作育人才之盛意倘有劣紳出而把持抵抗卽由臣等隨時酌懲以爲阻撓興學者戒除將辦理情形續行具 奏並分咨查照外所爲請將粵省書院全改爲學堂並酌提賓興學田等款以充學費各緣由謹會同學臣朱祖謀合詞恭摺具 奏伏乞 皇太后 皇上聖鑒謹 奏奉 硃批著照所請務卽飭令妥爲籌辦期收實效片併發欽此

岑春煊片 再興學一事迭奉 詔旨敦迫舉行在前日已屬要圖在今日尤爲急務緣近來士習益黨設辭益甚年少聰明之子胸無根柢偶聞一二新說便爾沈溺不計是非若非廣興學堂範以 欽定章程恐學術日漓隱憂方大廣東學務經前督臣陶模極力提倡旋以疾去官現署撫臣李興銳議設全省師範學堂適蒙 恩調任均係甫行其端未竟其緒廣西則以兵荒交迫益覺未遑是以奉興學之 詔雖已兩年而兩省不但少新辦之學堂且並舊有之書院亦相沿未改是非急圖舉辦不足以副 朝旨而正人心惟是茲事體大至重至繁必須設一總匯之區始可以資督率擬卽援照三江師範學堂及直隸學校司湖北學務處辦法設立兩廣學務處除武備學堂外自高等學堂以下及實業學堂均隸該處由臣遴員辦理並飭該處先設兩廣師範學堂以儲師資專注重德育以植其基廣興蒙小學實業學以求其溥育但使後來者不以爲無益遽加廢業更求明習教育者督率稽核務求完備則該處不同虛設

或冀有經正民興之一日除將辦理情形續行具奏並分咨查照外所有創設兩廣學務處緣由謹附片具陳伏乞 聖鑒謹 奏奉 硃批覽欽此

頭品頂戴護理廣西巡撫布政使臣丁體常跪 奏為帶勇員弁縱軍擄掠該管道員不即嚴究致令縱勇滋擾之員逃匿請 旨將該道員革職勒交究辦恭摺仰祈 聖鑒事竊臣接准署兩廣總督臣岑春煊咨會據兩甯探報電稟請署左江道何昭然委從九品何雲葆會同千總潘繼周帶勇赴龍安縣清鄉聞有縱兵滋擾鎮流等村情弊請派員查辦等語當經札飭接署左江道余誠格確查去後茲據余誠格稟稱詳細訪察本年二月何昭然札委候補從九品何雲葆帶領屬勇正營及幫帶潘繼周前往龍安縣匪二十五日駐紮鎮流村該村紳耆邀請何雲葆潘繼周到公局款待告以無匪搜查一過實無匪人各勇丁忽然開砲當傷五人斃二人遂乘勢焚燬房屋掠取女口牛隻錢穀二十六二十九等日連剽大滕新安駝懷舞球胡利吞捷等村亦掠女口牛隻衣物所掠女口皆勒錢取贖各村紳民報縣電稟該道何昭然以鎮流村為匪徙甘大明巢穴逃去後所餘贖牛多隻圍捕不為錯誤迨隆安縣勘明據實稟覆始飭府查提並不立拿嚴究潘繼周先經另案查有勾通匪類無惡不作已奏明請 旨正法在案何雲葆現經逃匿等情到營查該從九品何雲葆連剽各村擄婦女劫財物在逃未獲不足以伸民忿何雲葆與何昭然同族同鄉又係何昭然委用之員相應咨請查核會銜奏參並先將何昭然撤任責令將何雲葆交出究辦等因到臣臣查現在任太平思順道何昭然於前署左江道任內辦理屬邑勦匪事宜用人不

慎致管帶營勇之從九品何雲葆等縱軍擄掠勒贖已屬辦理失當迨據縣稟又不卽行嚴拿究辦因而何雲葆得以逃逸民忿莫伸尤屬咎無可辭相應請旨將太平思順道何昭然暫行革職勒令將何雲葆交出究辦俟能否交案再分別辦理謹會同署兩廣總督臣岑春煊恭摺具奏伏乞皇太后皇上聖鑒訓示再所遺太平思順道員缺照例應由外補容俟遴員請補現已委員前往接署合併陳明謹奏奉 硃批著照所請該部知道欽此

丁體常片 再泗城府屬凌雲西林西隆三州縣本係改土歸流土例相沿陋規頗多雖經歷任撫臣飭查裁革惟派用鄉夫一項以該州縣地屬邊繳缺分瘠苦向無夫役行店遇有需用人夫驟難雇募祇限以定額不許濫派並議給日食錢文以示體恤詎派夫之名色未除不肖官吏仍復藉以滋弊無論是否需吏皆按月照額輪派其應役者固無日食發給轉令未應役者按名繳錢實爲邊氓之累據署藩司朱榮琛詳請禁革並議給各該州縣津貼銀兩俾免藉口賠累聲請奏明永除積弊前來除批飭立即通行禁革嗣後該三州縣永不許有派用鄉夫名色倘再敢以此苛派斂錢卽從嚴參處以昭懲儆謹附片陳明伏乞 聖鑒訓示謹 奏奉 硃批知道了欽此

頭品頂戴安徽巡撫奴才誠勳跪 奏爲安徽省現辦賑捐勢難停止擬請再行展限一年以資接濟恭摺仰祈 聖鑒事竊查接管卷內安徽省賑捐遵照光緒二十七年八月二十三日部咨銜封貢監均以五成實銀上兌各項翎枝仍按照賑捐章程收捐等因接續勸辦在案計自光緒二十八年八月初八四

次展限之日起除去封印日期扣至二十九年九月初八日又屆一年期滿本應依限停止惟皖省自光緒二十七年沿江水災之後元氣大傷一時實難遽復加以上年合肥壽州定遠滁州全椒等州縣均被旱災民情益形困苦仰蒙 聖恩准於陝西義賑欵內寬籌酌撥協濟春賑而災重地廣仍屬不敷散放所有各省籌墊之欵義紳撥放之欵均須分別籌還值此庫藏告匱舍辦捐外別無集欵之法勢難遽行停止惟有再行展限一年藉資挹注第捐務久成弩末改章以來收數更爲減色推其原故各捐生多因五成實銀上兌爲數較鉅無力報捐現在需欵正繁亟應設法變通期收實濟查四川現辦賑捐凡銜封貢監均照新章五成之數遞減一成以四成實銀上兌又山東賑捐所收十成貢監銀兩仍留本省濟賑免其解部量加推廣參將游擊准捐二品頂戴其都司在任以參游升用者加一倍報捐以參游補用者加五成報捐均經戶部議准在案今安徽賑捐事同一律並請援案辦理據督辦賑捐局藩臬兩司具詳請 奏前撫臣聶緝槩未及核辦卸事移交前奴才覆核無異合無仰懇 天恩俯念皖省工賑待欵孔殷兼須籌還墊欵准自光緒二十九年九月初八日限滿之日起按照賑捐奏定新定章程再行展辦一年以廣招徠而資接濟出自 高厚鴻慈除咨部查照外謹會同兩江總督臣魏光燾恭摺具陳伏乞 皇太后 皇上聖鑒訓示謹 奏奉 硃批著照所請戶部知道欽此

頭品頂戴兵部尚書銜署理兩廣總督臣岑春煊跪 爲廣西主客各軍營名繁雜章制紛歧現飭酌量更定以昭劃一恭摺繕單具陳仰祈 聖鑒事竊查廣西自用兵以來或增募營勇或徵調客軍統計各

路防營不下四五十營營名既已紛繁營制餉章尤爲雜亂同在一處勦匪也而弁兵薪餉有厚薄之殊同爲一員統率也而各營人有多寡之異又有名雖一營而除去假革逃亡實存人數不過一二百名者若非另定劃一章程不足以資考核而期得力臣到潯以後卽詳加體察除現無軍務各屬駐營無多應暫毋庸議外其柳州慶遠思恩南甯四府正值勦捕喫緊營勇雲集柳州府屬則有克勇左營定勇營中字營又新招有裕字營紹字先鋒營慶遠府屬則有威字營盛字營實字營業字營忠字營克勇申字營克勇前後兩營安勇後營楚軍副左營南甯思恩兩府則有綏遠軍五營虎軍正副二營營制餉章有未經奏咨者有已經奏咨而時有更變者現臣飭將柳州府所駐各營改併爲紹字中左右三營委現署柳州府知府祖繩武統領慶遠府所駐各營除威字營仍歸現屬柳慶鎮楊發貴兼管外餘均改併爲綏靖中左右三營委現署慶遠府知府汪聲玲統領南甯思恩兩府所駐各營改併爲綏遠左右前後正中副中先鋒左右八營委代理思恩府知府和廷彪統領至各營人數多少無定現皆令按照廣西邊防各營奏定章程每營均以四百七十二員爲准並給長夫一百二十名及帳棚鑼鍋等項以免軍行時妄拉民夫及占住民房致滋擾累其弁兵薪餉內惟綏遠虎勇等營係東省調來尙爲優厚其餘各營所支薪餉甚薄實未能收飽騰之效亦一律改照湘軍行糧章程計每月支薪餉夫價約需銀二千五六百兩又廣西邊防二十餘營驕悍腐敗前經臣詳細奏陳現調湖北武建軍八營赴龍州換防俟到防時所有邊防各營應卽大加裁併以新耳目而資整頓現查得原充邊防各營分統參將張得貴千總陸榮廷於蘇元

春種種弊混該分統等均能矚然不滓且其平日治軍極爲認真應令張得貴將原統邊防親兵左右及新設副中前右等五營汰併另募改爲貴字五營專任南甯思恩兩屬防剿陸榮廷原統邊防健字春字等五營汰併另募改爲榮字五營專任太平鎮西兩屬防剿已革總兵陳桂林所統春字前左右毅軍新副左後五營補用副將黃雲高所統毅新正中左前後五營均極窳敗咨由署理廣西提督丁槐一併汰改另成衡字軍五營親兵一營營制餉章統照紹字綏靖等軍辦理此外尙有調署右江鎮總兵黃忠立所統邊防熙字四營現在泗城等處搜剿餘匪尙爲得力應仍其舊惟將月支薪餉亦與新改各營一律照加此臣到西省後更改營名釐定章制之情形也至桂省本係瘠區軍興以來餉項奇窘尤有岌岌不可終日之勢現在新改各營均一律由臣在前此奏准協撥各款內按月支給以免延誤其各營底餉除邊防各營均有的款應令撥歸督辦邊防鄭孝胥作爲武建軍餉及充一切邊防經費應用外其餘各營原支底餉現雖飭令廣西善後局司道逐款另儲而處此兵荒交迫商販斷絕之時各營底餉恐已大半無著如將來臣奏准協撥各款支發罄盡各該營應如何支餉惟有廣西撫臣察看地方情形或裁或併或另行籌款隨時酌核辦理除飭各統領營官將營務嚴加整頓認真防剿並分咨查照外所有裁改西省各路防營酌定章制以昭劃一緣由理合恭摺繕單具陳伏乞 皇太后 皇上聖鑒訓示謹 奏奉 硃批該部知道單併發欽此

岑春煊片 再廣西自軍興以來防軍雲集內有克勇中前後左右五營克勇衛隊一營克勇中字一營

係已革撫臣王之春任內招募成軍該撫臣又奏調楚軍正前正中副左親軍護衛四營來桂助勦各該營紀律廢弛且皆有名無實其弊混幾不可究詰現該營薪餉早無的款自應議法裁併以免籌措爲難除克勇前後左及申字等四營楚軍副左親軍護衛兩營均併入新改各營業已另摺奏明又楚軍正前一營較爲得力現在泗城駐紮亦暫緩撤外其餘克勇中右衛隊三營楚軍正中一營均飭一併裁撤並酌給恩餉派員押遣出境俾免逗遛生事除咨行外謹附片陳明伏乞 聖鑒謹 奏奉 硃批該部知道欽此

頭品頂戴調署四川總督閩浙總督奴才錫良跪 奏爲黔省來咨改辦黎平鹽務實於川銷大有窒礙將致藥壞成局虧損 邦計亟應瀝陳得失恭摺仰祈 聖鑒事竊准貴州護撫臣曹鴻勛咨稱司道具詳籌借本銀十萬兩派委大定府知府鄭思賢赴粵招集商股購買鹽包運至黎平古州銷售暫免三年釐稅以後再計銷行鹽斤各若干由商完繳並稱每年約銷二萬包詢該處尙可加倍每包百五十斤以五十斤爲運費每斤擬加價數文藉充黔餉分咨川粵查明等因查此事前據滇黔官運鹽務總局道等探悉黔員創議瀝陳窒碍情形業經咨黔查覆現在該護撫臣來咨業已委員購辦其事在於必行矣使行之而果益於黔或益於黔而不大損於 國計固奴才所甚願也第理財之道先較盈絀不必爲川黔而存畛域之見要必爲公家而權得失之分川省鹺綱頽壞已久故督臣丁寶楨設滇黔官運一局疑謗叢集幸賴 聖明主持乃得至今爲永利而該局銷路又以黔引爲大宗黔中十一府四直隸州廳概係

川鹽引岸僅黎平一府應銷粵鹽軍興後不引不商鹽由販運粵鹽賤而川鹽貴其數懸殊人之樂於食貴者蓋侵越引岸官爲禁緝况川鹽質味具美故黔語有云三脚等處久已改歸川岸於此見川鹽之銷行甚暢且遠也今辦黎平官運該府只轄一廳兩縣銷引幾何但以後商利於多銷官利於多運必至浸灌川岸隄防一潰莫可遏止川鹽前已費本稅釐增重水陸運遠緣是三者斷不能減價以敵粵鹽縱設督銷等局京外餉需新舊償款一有短絀從何彌補然則壞成局虧損邦計所關不可謂不鉅乃黔省鹽局委員專顧一隅頗類於見毫毛而不見眉睫其考查銷數有曰萬八九千包有曰二萬包又曰能加至四萬包照加者算每包抽錢數百文歲獲二三萬緡而已官局有費商股有息歸公已屬無多矧齒籍只有此數而歲銷增多於理奚當黔員等率稱粵鹽暗銷荔波等處且稱充銷遠等處明明川岸而公言侵越咨川者如是異日豈不爲商私而樹之幟來咨又曰先免粵中釐稅三年夫惟鹽美者無不疏行而裕課非可以蠲恤招徠也川鹽本貴又與不完釐稅之粵鹽併售而粵鹽復得黔中官吏利導其商兵一羸一縮川銷有不銳減者哉前者川同官商聞風疑懼籲訴環來今黔省確已行之奴才忝領蜀疆豈忍坐視其五綱照著之滇黔官運局爲之牽動使歲有所恃之餉源由此不可盡保通籌合計得失皎然覆閱黔咨當於川省權運情形未能盡悉而黔員引粵侵川之撓亂鹽法尤當嚴審其萌曲突非迂補牢恨晚若竟安於緘默何以上報君父下對同官茲據滇黔官運局等具詳前來相應仰懇天恩飭下貴州護撫臣停罷黎平官運一議黔省賠款無措川省已認加價十萬此外必求長策庶免利小害大

名是實非倘黔中意不可回亦非鄰者所能力阻應請嗣後如川局少銷黔引即將短征正雜各款在於解黔稅餉頂下照數扣除仍派遣員赴黔設局督銷以資維持而清界限所有黔省來咨改辦黎平官運實於川銷大有窒礙各緣由除咨部外理合專摺馳奏伏乞 皇太后 皇上聖鑒訓示遵行謹一奏奉 硃批戶部議奏欽此

頭品頂戴調署四川總督奴才錫良跪 奏爲川省京協各餉需用甚鉅援案再辦光緒三十年按糧津貼以資接濟恭摺仰祈 聖鑒事竊查川省自咸豐年間經前督臣奏准辦理津貼每糧一兩津貼銀一兩隨糧交納歷經戶部指撥京餉兵餉在案茲據布政使陳瑤詳稱光緒二十九年自開征起至十月底止各屬征解津貼銀兩均已撥解京協各餉及防勦經費之用統歸另案報銷所收捐輸釐金歷係供撥外省各餉毫無積存綜計收支各數實屬入不敷出來年奉撥京外各款爲數尤鉅若不豫爲籌備深恐貽誤要需擬請援照歷屆成案於光緒三十年再行勸辦按糧津貼每糧一兩仍收津貼庫平銀一兩於開征時隨糧交納由司刊刻告示遍貼曉諭除川北川南兩路酌留夫馬一二成照章隨糧攤收外其餘夫馬早已裁撤一切雜派經費概行禁革不准私立名目加派絲毫所有邊瘠之汶川梓潼廣元昭化劍州蘆山青神松潘茂州峨邊屏山馬邊雷波越嶲鹽源石泉恭江理番石柱天全筠連興文高縣琪縣叙永永甯清溪會理等三十廳州縣均照章免征津貼此外被水各州縣如有應行減免者當隨時查照向章辦理一俟收解完全綜計銀數再行加廣中額以昭激勸歷經戶部指撥京餉兵餉源源接濟除此津

貼之外無款可籌不得不援案辦理以免貽誤仍當恪遵 諭旨嚴飭各屬實征實解不准浮收分毫及另立別項名目如有前項情弊立即嚴參懲辦以仰副 聖主軫念民依之至意理合恭摺具陳伏乞 皇太后 皇上聖鑒訓示謹 奏奉 硃批戶部知道欽此

連順等片 再奴才等於上年十二月間奉 旨設立中俄通商事務局當因時值隆冬未能建蓋房屋擬暫就城內空閒房所先行設局開辦應俟來年再行斟酌 奏明在案計今半年有餘雖於交涉事件不致貽誤終覺事煩人少頗形拮据擬照各部院定制添設候補筆帖式二缺即由委署筆帖式內揀選咨部以資辦公實於交涉有裨至該貿易俄商亦頗安分並飭巡丁逐日在街市巡查遇有蒙俄交易口角即令該巡兵等就便彈壓排解辦理尙稱得手除飭該巡兵等仍在街市逐日認真稽查外所有前設商局屋宇逼窄本係遷就一時自應另建公署以符原奏查烏城舊有四部院皆在 萬壽宮外院兩旁分設現擬將地勢稍爲擴展左右應添蓋房屋六間令爲辦公局所以備存放案卷局內應用一切酌量添備與四部院聯合一處局面亦頗整齊並查 萬壽宮以及四部院自光緒七年建設訖今年久失修間有傾塌滲漏不堪之處應請一併稍加修補以期藉壯觀瞻而重公所但值庫款支絀力求撙節未敢過事鋪張約共需銀二千三百餘兩並此次另籌款項即由二十八年烏城各項六分減平項下動支惟烏城地處極邊工匠物料皆需取資內地價極昂貴若照部定價值估計實難購辦如蒙 俞允一俟工竣時謹按實用數目開具簡明清單送部核鎖是否有當理合附片陳明伏乞 聖鑒謹 奏奉 硃批

着照所請該衙門知道欽此

頭品頂戴兵部尙書銜山東巡撫臣周馥跪 奏爲山東停給世倬銜俸銀兩現屆二年期滿擬請將旗員世倬酌發一半漢員各俸仍行展緩以充武備學堂經費恭摺具陳仰祈 聖鑒事竊查山東省世職應領俸銀並候補武職支給銜俸向有額數凡在額內者青州德州滿營世職一百五員河標撫標暨充登曹三鎮到標世職三百八十員各州縣在籍世職一百八十員在東服官兼襲雲騎尉世職三員綠營在標候補武職照銜食俸自分發提督總兵以至副將參將遊擊都司守備千總把總並期滿武進士舉人二百八十三員每年支俸銀五萬六千餘兩內有照章祇發三季俸銀應扣減平折合實銀僅止四萬五千兩有奇光緒二十七年十月間升任撫臣袁世凱 奏請援照福建省辦法無論旗員漢員在籍在標一律停止一半聲明前項銀兩留作武備學堂經費欽奉 硃批該部知道欽此欽遵轉行一面開辦武備學堂考取各州縣及防營保送合格學生共學生三百二十名遴派教習入堂訓練頗具規模嗣於本年二月間准北洋大臣袁世凱鈔奏咨稱以山東省應遵 旨挑選將弁赴北洋學習等因經臣分別咨行青州副都統德州城守尉兗州等鎮總兵及各防營陸續挑選官弁兵目二百四十四員名派員咨送北洋學堂收考肄業在案所需餉銀均在節省世倬銜俸項下儘數開支不敷之款另行籌補而肄業官弁中並有停給俸餉之員取入學堂隨班練習成就有期亦不失其登進之路惟前項俸餉計自光緒二十七年冬季停止起扣至二十九年冬季二年滿限學堂爲儲備將材之地勢難中輟臣與司道再三

商酌擬請將漢員世俸銀兩及候補武職銜俸銀兩仍行停給留作武備學堂經費俾收實效將來如能另籌的款自當循例支發至於青德滿營世職素無恒產情形較苦並請將應領世俸銀兩停支一半仍充學堂之費發給一半同半折一項暨該滿營孀婦世俸半餉照常給領以示體恤茲據布政使胡廷幹詳請奏咨前來理合恭摺具陳伏乞 皇太后 皇上聖鑒訓示謹奏奉 硃批戶部知道欽此

周馥片 再上年山東省惠民等縣劉旺庄等處黃河漫溢欵絀用繁經臣奏請將常例准捐之捐免本班捐坐補捐免試俸歷俸捐免實授以及捐離省分發指省等七項由山東收捐一年專作黃河辦工之用經部議准於光緒二十八年九月十九日具奏奉 旨依議欽此欽遵辦理在案伏查近年物力彫敝捐務久成弩末前項捐輸自上年九月開辦以來截至本年九月止一年期滿收數未能踴躍上年黃河馮劉兩工出欵較多虧短甚鉅皆係挪墊應付全賴工捐集成鉅欵藉資彌補加以本年利津甯海莊黃河又復漫溢需欵浩繁亦須湊濟若依限停止更屬無從周轉合無仰懇 天恩俯准將常例七項捐展限一年由臣督飭勸捐各員廣為勸募以濟工需據工賑捐局司道請奏前來理合附片陳請伏乞 聖鑒訓示謹奏奉 硃批著照所請戶部知道欽此

魏光燾等片 再蘇省濱江臨海湖蕩紛歧向為匪徒出沒之區近年時有游勇鹽梟暗地勾結乘間蹈虛肆行剽劫大為地方之害疊經臣等嚴飭防營及各該州縣協力拿辦尙難盡絕根株推原其故實因匪船迅疾飄忽靡常蘇省僅有蘇防五營及太湖水師分布蘇松常鎮太五府州屬各有分防汎地守衛

局卡保護教堂之責兵力本極單薄遇有股匪滋事必須於各營酌量抽撥及至調集隊伍前往剿捕而匪蹤業已遠颺彼速我遲往往緩不濟急尤恐涓涓不塞將成江河爲患何堪設想臣等一再籌商非另募一營專司緝捕不足收因地制宜之效查江甯本有督捕水陸營哨頗資得力蘇省擬亦添募蘇捕一營五百人略如江甯規制以二百四十人作水師配設靈便快船三十艘以二百六十人爲陸師分作三哨遴選熟悉情形樸誠勇敢之員爲管帶認真訓練專備雕勦遇匪卽捕庶足以弭梟風而消隱患於地方實有裨益所有應需餉項臣等當督同司局於無可設法之中竭力籌備的款應用仍俟梟匪斂跡卽行奏明裁撤俾節餉需除咨部查照外是否有當謹合詞附片具陳伏乞 聖鑒訓示謹奏奉 硃批該部知道欽此

魏光燾等片 日再欲除外奸先弭內患蘇省民風疲憊振拔需人求一嚴明持正之才以激厲之頗不易得而將領中尤難其選茲查有在籍湖南永州鎮總兵孫金彪謀勇兼優素孚鄉望辦事亦極認真因籍隸元和一切情形尤能深悉若令辦理營務必能力除積習裨益地方可無隔閡因循之慮臣壽此次在甯監臨與臣光燾籌商整頓之法挽頽救弊相需甚殷惟該員係實缺總兵大員在滬就醫將漸痊可臣等公同商酌擬暫留在蘇整頓營務因有職任本敢擅便合無仰懇 天恩俯念地方緊要時事需人可否將總兵孫金彪暫准留蘇委辦營務俾臣等得收指臂之助一俟匪戢梟除卽行奏請赴任出自 逾格鴻施除咨部查照外謹合詞附片陳請伏乞 聖鑒訓示謹奏奉 硃批著照所請該部知道欽此

福州將軍兼署閩浙總督奴才宗室崇善跪 奏爲閩省賑捐援照川省成案遞減一成以期捐務起色恭摺仰祈 聖鑒事竊准部咨議奏停止實官捐輸案內聲明各省賑捐均以五成實銀上兌等因當經分別轉行遵章辦理惟是捐務已成弩末籌勸本極爲難近自改章以來收數更覺寥寥蓋因各捐生以五成實銀上兌爲數過鉅無力報捐相率觀望現在閩省開濬西南兩港河工尙未就緒而又正值青黃不接設法購米平糶需款浩繁亟應設法變通以資接濟查上年四川省奏請將賑捐銜封貢監各項均照新章五成之數遞減一成以四成實銀上兌經部核議奉 旨俞允在案嗣山東省亦於本年三月間援案奏准以四成實銀上兌今閩省事同一律自應援照辦理合無仰懇 天恩准將閩省賑捐援照川省成案凡銜封貢監等項照新章五成之數均予遞減一成以四成實銀上兌俾捐務可期起色不致貽誤要需據福建賑捐局司道具詳請奏前來除咨部外理合恭摺具陳伏乞 皇太后 皇上聖鑒敕部核覆施行謹奏奉 硃批戶部議奏欽此

頭品頂戴調署四川總督閩浙總督奴才錫良跪 奏爲遵照部咨督飭司道等籌議滇省銅本萬難再辦川鹽加價實由今昔情形迥異未敢稍涉遷就致滋貽誤恭摺陳仰祈 聖鑒事竊查接管卷內前准戶部咨遵議督辦雲南礦務唐炯奏請飭四川仍照部議鹽斤加價撥作銅本的款等摺片行令川省轉飭鹽道及官運總局妥速籌辦並先行挪墊銀五萬兩解交應用等因旋准唐炯咨開前由卽經檄行藩司鹽茶道滇黔官運總局切實妥議茲據該司道等詳稱川省鹽務今昔情形迥異連年水潦饑饉米

貴錢荒井灶時虞不支今年火井又多堙塞鹽價騰起檢查現在引數與初辦官運時核本各册逐細比較每引鹽價貴至七八十兩不等長撥各船運費亦復逐漸加增約計鹽本運費合之三次加價暨滇黔通攤之款較初辦時每引核本增至百餘兩鹽價每斤貴至二十餘文方求平價以敵私販實難屢加以滯銷路加之票販人衆弱者繞越偷漏强者恃衆恣橫今如票釐一律照加深恐貧民失利狡徒走險若竟不問票販專辦引案則引鹽成本偏重立見票私充塞而邊地尤爲可虞滇粵私鹽侵逼防不勝防一思邊計因加價滯銷引積課懸廠岸重困有誤四省餉源貽害實非淺鮮查第三次償款加價部議原係每斤四文前督臣奎俊縷晰陳奏始減一文是以加價之難不自奏覆銅本爲始况川省加價引票並計每歲僅收銀二十餘萬歷經奏報在案今縱加價一文豈能得銀四十萬兩且濟楚以及湖北八州縣計引加價全數劃歸鄂省凡此皆非滇省所知悉故操算未能得實而廠岸情形月異歲遷其不能執前律後有斷斷然者在鹽價尙平之時多取本易而成本既重之後少取亦難應仍請免辦銅本川鹽加價一文以恤廠岸而顧餉源又奉飭豫墊銀五萬兩解滇應用俟加價收有成數照數扣還現在加價萬難再辦而奉撥京外本省餉項司局等庫悉索無餘實在無從挪墊亦請由部另行籌撥的款解滇濟用等情前來伏查銅本事關京運苟能措手必當力任其難惟奴才抵川卽以蜀之鹽利繫於國計民生者重先應考求要畧極知近歲廠鹽固貴於前而官運兩局正難攤征每引至百二十兩其數更倍於昔本重征繁鹽價無不騰踊而唐炯猶謂之輕減殆在遠未深考耳大抵加價之難辦引鹽而外尤有一端一則

五十餘屬盡食粟鹽貧民挑負成羣艱難數貫之資俯仰一家之計錙銖利害必較故屢次因加釐起鬩見於章奏載於案牘現在粟鹽每斤抽正釐加價十餘文買本佔多運銷利薄非越山踰領以改道卽糾夥併包而闖關人數實繁刑不能止故再加則弊愈甚不加則引鹽又偏重矣一則鹽課歸於州縣初辦加價仍令按引隨糧攤收所食粟鹽既經加價乃復重征不已而梁山新寧等縣輒至倍增於額賦士民嗟怨前督臣奎俊曾檄以後不再加攤今剔除之則解不足數若一律加派其勢斷不可行凡此情形該司道等言之猶有未盡處非唐炯所能計及唐炯前奏雖自謂洞悉川省鹽務但卽以收數而論川省每次加價不過收銀二十餘萬唐炯乃云四十萬兩多寡懸異豈非去蜀二十餘年今昔判然有迥出意料者哉奴才與該司道等再四熟商前署督臣岑春煊以此議爲難行可稱確論倘勉強加之不獨大拂川民之願必致商販疑阻釐課短絀實於四省餉源多有窒礙此則奴才未敢稍涉遷就者也加價既萬難再辦部文先解銀五萬兩亦應如該司道等所請辦理相應請 旨敕下戶部另爲滇省籌撥銅本俾可永作的欸無誤要需除分咨外理合恭摺具陳伏乞 皇太后 皇上聖鑒訓示謹奏奉 硃批戶部議奏欽此

頭品頂戴調署四川總督閩浙總督奴才錫良跪 奏爲藩司年力就衰訓子不嚴據實糾參請 旨分別懲處恭摺仰祈 聖鑒事竊維求治首飭廉隅行法貴先自上未有上司政事不能清肅而能責屬吏不染貪汚者也查四川惡習每遇書吏出缺項補者謂之頂參行賄者謂之參費因之侵挪公帑肆無顧

忌是賄入私室而於公家求所償言之實堪痛恨身謂大吏方禁革之不暇豈有不自修飭先蒙不潔以賂口實而長貪風乃四川布政使陳璠上年在臬司任內署理藩司適有頂參書吏索費甚鉅該吏黃智周因負重債愁急自刎近日其妻黃李氏亦以債逼服毒殞命僉謂陳璠之子分省補用道陳大誥實主持之在陳璠知情故縱固屬罪不容辭倘竟冥然罔覺亦屬聾瞶無用現值整頓庶務之時四川大省藩司重任以年老昏邁之人濫廁其間貽誤匪細奴才到任後以其精力衰頹辦公竭蹶諷以引退之義該員志殷報稱不敢圖安近更老病侵尋心神恍惚辦事每多顛倒錯亂萬難再爲遷就致滋叢脞乃遍告寅僚代爲婉勸均謂該員曾云待至明春始議歸計同人無從進言夫引年固有明義戀棧當屬恒情設公事勉可支持奴才何忍不爲涵蓄惟目下諸務勢將停擱若聽推延必致全行隳廢且其子倚勢貪利荒謬絕倫去冬妄拿民婦鍾吳氏作爲廖觀音幾成大獄幸經前署督臣岑春煊督訊審釋遂卽畏罪遠避治至岑春煊調任兩廣陳大誥又由上海挾妾回川沿途觀者如堵播爲笑談復招集婦女乘坐水師砲船招搖西上奴才由鄂入蜀沿途風聞殊爲詫異當飭川東道賀元彬確查稟覆相符陳大誥回川後懲息其父半月間撤換營官幫帶十九員之多若謂陳璠整頓營務何不早爲振作乃至將卸護督始行紛紛更易人言嘖嘖殆非無因奴才與陳璠在淞同官年餘極稱相得既不敢因私而廢公亦不敢姑息以爲愛弟念陳璠宣力有年平日循謹去歲捕拿拳匪尙有微勞刻下實因年老精神不能周到疏於防察合無仰懇 天恩俯賜四川布政使陳璠開缺原品休致以重地方陳璠之子二品銜分省補用道陳

道欽此

魏光燾片 再查有江蘇候補道俞明震本由詞曹散館學有根柢於時務兵事尤不厭求詳經前督臣劉坤一保送經濟特科在案該員才識通明志趣遠大前赴日本考察武備及學校事宜均能究其體要委充陸師學堂總辦整理規模盡心率督教育多士深資造就現調辦釐捐局務尤能綜核精密裨補餉源際此需材孔亟可否仰懇 天恩飭下吏部帶領引 見量予錄用之處出自 逾格鴻施謹附片陳請伏乞 聖鑒訓示謹 奏奉 硃批俞明震著交部帶領引見欽此

魏光燾片 再新授浙江處州鎮總兵蔣雲龍請 旨陛見前經據情代 奏茲於本年九月二十日奉到 硃批著毋庸來見欽此查該總兵蔣雲龍現署臣標中軍副將兼統練軍中前後三營應即交卸赴新任惟南洋水陸武備正在整理將領需才蔣雲龍久歷戎行饒有胆略所統防軍撫馭咸宜於營務地理均稱熟悉尙資得方又福建建甯鎮總兵徐傳隆韜鈴夙裕駕駛熟諳歷充南洋兵輪各管帶於沿海沿江情形均能認真考察該總兵前署理水師淞北副將交卸後正擬馳赴福建新任適開廠新造建威建安魚雷快船兩艘由福建船政大臣崇善 奏准撥歸南洋應咨會派員驗收臣以徐傳隆素嫻兵輪棧器管駕一切事宜當經派委前往驗收將來駕駛回甯擬即責成該總兵管帶藉資熟手合無仰懇 天恩俯准將該總兵蔣雲龍徐傳隆仍暫留於兩江委用緩赴新任俾臣得收臂助之益理合附片陳請伏乞 聖鑒訓示謹 奏奉 硃批著照所請欽此

頭品頂戴兵部尙書銜山東巡撫臣周馥跪 奏爲疊次救護中外失事商船出力各員照章請獎恭摺
仰祈 聖鑒事竊查光緒十年七月二十一日承准總理各國事務衙門咨開續議保護中外船隻遇險
章程嗣後文武各員遇有中外船隻在洋面遭風觸礁瞬將沈沒者果能奮身冒險救出至三十人以上
准其比照異常勞績奏獎每次不得過兩三員等因山東沿海洋面島嶼紛歧礁石林立歷年船隻多有
失事向由登萊青道督飭各府州縣在於沿海緊要口岸設立拯濟局備船救護並遴派委員司事駐局
協同經理歷將救護出力人員分別保獎均經恭奉 硃批著照所請獎勵等因欽此欽遵行知各在案
茲據東海關監督登萊青道李希杰轉據各該印委稟報光緒二十八年八月初二日天津合茂順商船
在蓬萊縣解宋社洋面遭風觸礁瞬將沈沒經代理蓬萊縣知縣朱行祺會同拯濟局委員指分河南試
用知縣胡藩天橋口稅局委員指分江蘇試用縣丞解茂毓馳往救護登時救起舵工水手搭客四十四
名是年八月二十日奉天張鴻順商船在蓬萊縣大欽島洋面九月初三日奉天孫聖明商船在蓬萊縣
天橋口洋面均係遭風觸礁瞬將沈沒經登州府拯濟局委員指分山東試用知縣李福全試用巡檢樊
國森會同營員儘先補用都司李葆城先後馳往救護登時救起張鴻順舵工水手搭客二十七名孫聖
明船舵工水手搭客三十名共五十七名是年十月二十一日日本永田丸輪船在海豐縣杜家溝洋面
迷霧觸礁瞬將沈沒經署海豐縣知縣楊在芳會同埋子口稅務局委員劉遙成大沽河巡檢胡文煥馳
往救護登時救起日本人及華人搭客水手等七百五十名是年十一月二十日榮成田洪順商船在甯

海州崆峒島洋面十二月初三日奉天恒興順商船在寧海州北頭村洋面均係遭風觸礁瞬將沈沒經署理寧海州候補知縣陳禮森會同拯濟局委員指分山東試用縣丞馬武金巖山口及釐局委員試用府經歷華晉衡先後馳往救護登時救起田洪順船水手五名恒興順船舵工水手搭客三十二名共三十七名二十九年三月十二日英國維都利亞輪船在蓬萊縣小竹山洋面迷霧觸礁瞬將沈沒經蓬萊縣知縣李于錯會同天橋口稅局委員指分山東試用縣丞張秉澤拯濟局附生章恩壽馳往救護登時救起搭客水手華人三十三名英美日本人十一名英女一口共四十五名口均經隨時稟報有案竊查該員等在蓬萊海豐甯海各州縣境所轄洋面先後救護中外失事商船七隻當時或迷霧觸礁或遭風折桅人皆落水危在頃刻該員等於大霧迷漫狂風駭浪之中不避危險奮身前進督率勇役各駕船筏登時救起各該船舵工水手搭客人等共九百三十三名逐案分計均各在三十人以上撈起貨物亦均各逾六成實屬異常出力自應照章請獎以昭激勸現據東海關監督登萊青道李希杰詳請具奏前來合將各案出力人員繕具清單恭呈 御覽合無仰懇 天恩俯准將單開各員一併照擬給獎以示鼓勵出自 逾格鴻施除將各該員履歷分咨外務部吏部兵部查照外理合會同北洋大臣直隸總督臣袁世凱恭摺具陳伏乞 皇太后 皇上聖鑒訓示謹 奏奉 硃批著照所請該部知道單併發欽此謹將山東省疊次救護中外失事商船出力各員擬請獎勵繕具清單恭呈 御覽

在任候補直隸州代理蓬萊縣曲阜縣知縣朱行祺請免補直隸州以知府在任候補 蓬萊縣知縣李

千錯請以直隸州知州在任候補 署理甯海州知州候補知縣陳禮森請俟補缺後以直隸州用並加四品銜 直隸州用署理海豐縣候補知縣楊在芳請俟補缺後免補直隸州以知府用 指分山東試用知縣李福全請免補本班以直隸州仍留原省補用並加四品銜 指分河南試用知縣胡蕃請以知縣仍留原省歸候補班補用 指分山東試用縣丞張秉澤馬武金北河候補縣丞劉適成指分山東試用縣丞解茂毓以上四員均請免補本班以知縣仍留原省補用並加同知銜 試用府經歷華晉衛請免補本班以知縣仍留原省補用 海豐縣大沽河巡檢胡文煥請以縣主簿在任候補 試用巡檢樊國森請免補本班以縣主簿仍留原省補用 附生章恩壽請作爲貢生以縣丞分省補用 儘先補用都司李葆城請免補都司以遊擊儘先補用奉 硃批覽欽此

頭品頂戴兩江總督臣魏光燾跪 奏爲搜捕私梟會匪拿護首要各犯訊明分別擬辦恭摺具陳仰祈 聖鑒事竊照江淮一帶伏莽滋多鹽梟會匪互相勾煽往往乘間竊發爲害地方臣到任後屢飭各屬認真拿辦本年五月間訪有匪首曾幟漳濟匿常州江陰等屬內河開堂立會誘約多人遣黨分路肆行搶劫意在糾集巨股以圖抗拒同時並有匪目崔得沅李金標熊滿堂等設會拜盟與曾幟漳結爲死黨各踞地段當經臣密派補用直隸州知州王世綬候補都司徐寶山帶領水師砲隊並飭統領護軍正任福山鎮總兵楊金龍調派管帶護軍副左旅副將紀步高正右旅副將趙自新各帶勇隊乘登瀛洲兵輪馳往掩捕又調署福山總兵丁華容選帶得力弁勇乘坐策電小輪督率水師溯流堵截一面電飭各處

文武一體協拿兜捕先經徐寶山帶隊進港拿獲匪黨四名匪船六隻駐軍於通州所屬之蘆涇港適浙西緝私營候補都司張有基蘇松鎮遊擊張占魁各帶營船相助探悉匪首曾愾漳熊滿堂駕領多船部勒兇黨於白茅沙淺地方踞險抗拒徐寶山親率師船前進該匪等竟敢開放鎗炮列隊拒敵徐寶山激勵各軍奮勇環擊王世綬紀步高亦各率步隊分路夾攻匪始敗潰曾愾漳受傷潛遁當場槍殺及溺斃數十名擒獲匪首熊滿堂匪目彭老三張雲山吳朝棟張得榮陽寶春並夥黨共二十八名奪獲匪船十二隻偽印旗幟鎗械多件官軍勇丁傷斃二名受傷五名又據署通州直隸州知州王仁東會營拿獲匪目羅少臣一名匪黨兩名隨飭將先後拿獲各犯押解來省發交營務處候補道夏時濟會同江甯府知府羅章切實研訊熊滿堂供認開立天目山聚義堂糾衆入會旋與曾愾漳合股曾在崇明縣屬強劫沈恒豐典鋪得贓此次率帶匪船爲曾愾漳拒捕不諱彭老三張雲山吳朝棟張得樂陽寶春羅少臣或供認充當會中頭目受有掃江候副元帥各項僞職或入會販私行劫拒捕殺人均屬罪大惡極經臣核明罪情查照定章將熊滿堂等七犯批飭先行正法梟示一面嚴飭各營密捕首匪曾愾漳及其餘黨去後隨據管帶浙江緝私營補用副將周遠明會同署江陰縣知縣郭曾程督率勇役拿獲匪目崔得元一名又據如皋縣知縣單儒拿獲匪首李金標一名並飭解省發審正在審辦間欽奉 上諭有人奏江蘇鹽臬會匪充塞引岸劫掠商民但事招撫恐滋後患等語著魏光燾妥爲籌辦等因欽此當此辦理大概情形先行電 奏聲明匪目崔得沅等應與前獲之各犯分別輕重再行擬辦在案茲據營務處候補道夏

時濟江甯府知府羅章訊據崔得沅李金標均供認充當頭目爲會幟漳經理山堂事務接濟會內軍火疊犯強劫得賊並於前獲各犯內訊明吳茂生劉得發張海濤會四宗明富俱係會幟漳悍黨或夥衆強劫或窩藏首匪並皆在場拒捕又經臣批飭照章正法梟示以示炯戒其餘情節較輕罪不至死各犯亦經酌擬年限分別監禁免致遣戍脫逃仍爲民害現在地方安謐引岸銷數亦尙暢旺伏查此次梟會各匪結黨甚多蓄謀不軌本年夏間各屬訛言時起其勢殊爲猖獗幸立時撲滅不致蔓延貽患雖首匪會幟漳現尙在稽誅而悍黨多已就獲經此懲創詢足以寒匪胆而安閭閻所有在事出力文武員弁不無微勞足錄可否仰懇 天恩俯准由臣據尤酌保數員以資鼓勵出自 鴻施除再分飭懸立重賞嚴密拿逸犯會幟漳務獲懲辦不容鬆勁外謹會同江蘇撫臣恩壽恭摺具陳伏乞 皇太后 皇上聖鑒訓示謹 奏奉 硃批着俟拿獲首犯後再行酌保數員毋許冒濫欽此